





宋史新編卷一

本紀一

明南京戶部主事莆田柯維騏編

本紀

太祖

太祖啓運立極英武睿文神德聖功至明大孝皇帝諱  
匡胤姓趙氏涿郡人高祖眇是爲僖祖唐幽都令眇生  
珽是爲順祖歷藩鎮從事兼御史中丞珽生敬是爲翼  
祖涿州刺史敬生弘殷是爲宣祖少驍勇善騎射事趙  
王王鎰將五百騎援唐莊宗于河上有功莊宗留典禁  
軍漢乾祐中討王景於鳳翔會蜀兵來援戰于陳倉始



合矢集左目氣彌盛奮擊大敗之遷護聖都指揮使周  
廣順末累遷右廂都指揮使領岳州防禦使從征淮南  
前軍却吳人來乘邀擊敗之顯德三年督軍平揚州累  
官檢校司徒天水縣男與太祖分典禁兵一時榮之卒  
贈武清軍節度使太尉宣祖娶杜氏是爲昭憲皇后後  
唐天成二年二月十六日生太祖於洛陽夾馬營赤光  
繞室異香經宿不散旣長容貌雄偉器度豁如識者知  
非常人初應募居周祖帳下廣順中拜滑州副指揮轉  
開封府馬直軍使顯德元年從世宗戰高平敗漢兵還  
拜殿前都虞候三年從征淮南南唐節度皇甫暉姚鳳

舉號十五萬太祖手刃暉并擒鳳尋敗齊王景達于六  
合東斬首萬級連拜定國軍節度使四年春從征壽州  
下之還拜義成軍節度檢校太保仍殿前都指揮使冬  
從征濠泗又下之五年改忠武軍節度使六年世宗北  
征爲水陸都部署降其守將戰却數千騎關南平世宗  
在道閱文書得韋囊中有木三尺餘題云點檢作天子  
時張永德爲點檢卽命太祖代永德世宗崩子宗訓立  
改太祖歸德軍節度檢校太尉會北漢結契丹入寇命  
出師禦之乃七年正月癸卯發汴京時周帝幼將士陰  
謀推戴軍中知星者苗訓視日下復有一日黑光摩盪



者久之語太祖親吏楚昭輔曰此天命也次陳橋驛夜  
五鼓軍士集驛門宣言策點檢爲天子遲明逼寢所太  
宗與掌書記趙普入白太祖起諸校露刃列于庭曰詣  
軍無主願策太尉爲天子卽被以黃袍羅拜呼萬歲掖  
乘馬太祖攬轡謂之曰我有號令汝能從乎皆下馬曰  
唯命太祖曰太后主上吾皆北面事之不得驚犯大臣  
皆我比肩不得侵凌朝廷府庫士庶之家不得侵掠用  
命有重賞違卽孥戮汝皆載拜肅隊以入副都指揮使  
韓通謀禦之軍校王彥昇遽殺通於其第太祖進登明  
德門令甲士歸營乃退居公署有頃諸將擁宰相范質

等至太祖見之流涕曰違負天地今至于此質等未及  
對列校羅彥瓌按劍厲聲曰我輩無主今日須得天子  
質等相顧計無從出乃降階列拜召文武百僚至晡班  
定翰林承旨陶穀袖中出周帝禪詔曰天生丞民樹之  
司牧二帝惟公而禪位三王乘時而革命其極一也予  
末小子遭家不造人心已去天命有歸咨爾歸德軍節  
度使殿前都點檢趙匡胤稟上聖之姿有神武之略佐  
我高祖格于皇天逮事世宗功存納麓東征西怨厥績  
懋焉天地鬼神享于有德謳歌獄訟歸于至仁應天順  
人法堯禪舜如釋重負予其作賓嗚呼欽哉祗畏天命



宣徽使引太祖北面拜受掖升崇元殿服袞冕卽皇帝  
位遷周帝及符后于西宮易其帝號曰鄭王尊符后爲  
周太后

建隆元年春正月乙巳大赦改元定有天下之號曰宋  
中外百官加恩軍士賞賚有差戊申詔曰易姓受命王  
者所以應期臨難不苟人臣所以全節周故天平軍節  
度使檢校太尉同平章事侍衛親軍馬步軍副都指揮  
使韓通振迹戎伍委質前朝彰灼茂功踐更勇爵夙定  
交於霸府遂接武於和門艱險共嘗情好尤篤朕以三  
靈睠祐百姓樂推言念元勳將加殊寵蒼黃遇害良用

憮然可贈中書令以禮收葬辛亥論翼戴功以周義成  
軍節度使殿前都指揮使石守信汝寧軍節度使侍衛  
親軍馬軍都指揮使高懷德武信軍節度使侍衛親軍  
步軍都指揮使張令鐸殿前都虞候王審琦虎捷右廂  
都虞候張光翰龍捷右廂都指揮使趙彥徽及凡領軍  
者進爵有差以弟光義爲殿前都虞候領睦州防禦使  
趙普爲右諫議大夫樞密直學士乙卯遣使分賑諸州  
已未以生日爲長春節癸亥以周天雄軍節度使魏王  
符彥卿雄武軍節度使王景定難軍節度使西平王李  
彝興荆南節度使高保融及凡領節鎮者進爵有差已



已立太廟二月乙亥尊母杜氏爲皇太后以周司徒兼  
門下侍郎同中書門下平章事范質尚書右僕射兼門  
下侍郎同中書門下平章事王溥行中書侍郎同中書  
門下平章事魏仁浦樞密使吳廷祚並依前加官有差  
庚寅進士楊礪等賜第有差自是歲貢舉三月丙辰南  
唐主李景吳越王錢俶遣使以御服錦綺金帛來賀壬  
戌定國運以火德王色尚赤臘用戊夏四月癸酉判太  
常竇儼上二舞十二樂曲名樂章癸巳昭義軍節度使  
李筠結北漢起兵據澤州遣歸德軍節度使石守信等  
率兵討之五月己亥朔日有食之庚子遣昭化軍節度

使慕容延釗彰德軍節度使王全斌將兵出東道與守  
信會計李筠壬寅竇儼上太廟舞曲名癸卯石守信敗  
李筠于長平甲辰命諸道進討丁巳詔親征李筠以樞  
密使吳廷祚留守上都弟都虞候光義爲大內都點檢  
命天平軍節度使韓令坤屯兵河陽己未帝發京師丁  
卯李筠率衆迎戰石守信高懷德大破之擒其將范守  
圖殺北漢援兵之降者數千人筠遁入澤州王師圍之  
六月辛未拔澤州筠赴火死癸酉有星赤色出心乙酉  
帝進伐上黨時筠子守節守之丁亥守節以城降赦之  
帝如潞甲午永安軍節度使折德晟破北漢沙谷砦秋



七月戊申帝至自潞乙丑南唐進白金賀平澤潞隨進  
乘輿御服物是月荆南節度使高保融卒弟存勗嗣知  
軍事八月壬午以光義領泰寧軍節度使甲申立王氏  
爲皇后戊子以趙普爲樞密副使是月詔有司定權衡  
頒之九月丙午上四代帝后徽號及廟諡語在禮志已  
未淮南節度使李重進起兵於揚州遣石守信等率兵  
討之冬十月丁亥詔親征十一月丁未王師傳揚州城  
拔之重進盡室自焚戊申南唐臣杜著薛良來奔帝疾  
其不忠斬著配良爲牙校庚申南唐主遣子從鎰來朝  
十二月丁亥帝至自揚辛卯泉州節度使留從效稱藩

是歲帝幸國子監脩文宣王廟三佛齊國來貢

二年春正月壬子商州鼠食苗詔免賦帝謂宰臣曰比  
命使度田多邀功弊民當慎其選以見朕意二月荆南  
高存勗南唐李景各進禮物夏四月癸巳朔日有食之  
六月甲午皇太后杜氏崩秋七月壬申以光義爲開封  
府尹光美行興元尹八月甲辰南唐主李景卒子煜嗣  
巴西執易定節度使孫行友九月壬戌朔南唐李煜遣  
使進金幣冬十月丙午葬明憲杜太后于安陵是歲宴  
射玉津園迎春苑畋近郊自是歲屢幸其幸玉津園也  
謂侍臣曰沉湎非令儀朕宴偶醉恒悔之女真占城回



鵲三佛齊來貢

三年春正月甲戌廣皇城二月庚寅詔文班官舉堪爲  
賓佐令錄者各一人不當者連坐甲午詔自今百官朝  
對須陳時政利病無以觸諱爲懼己亥詔曰王者禁人  
爲非乃設法令臨下以簡必務哀矜世屬亂離則糾之  
以猛人知恥格則濟之以寬竊盜之生本非巨蠹近朝  
立制重於律文甚非愛人之旨自今竊盜贓滿五貫足  
陌者死壬午帝謂侍臣曰朕欲武臣盡讀書以通治道  
何如左右不知所對三月己巳詔申律文諭郡國犯大  
辟者刑部審覆夏四月泉州節度使留從效卒牙將陳

洪進執其子紹鎡歸于唐推張漢思爲留後五月乙酉  
以諸州旱減膳徹樂六月癸巳吳廷祚罷爲雄武軍節  
度使秋八月乙未詔諸行賂獲薦者許告許詔舉書判  
拔萃科九月壬申脩武成王廟冬十月辛丑以趙普爲  
樞密使十一月荆南節度使高存勗卒保融子繼冲嗣  
知軍事十二月甲辰衡州刺史張文表叛是歲周鄭王  
出居房州吐蕃效順歸伏羌縣地高麗女真占城回鶻  
三佛齊來貢蒲晉慈隰相衛諸州饑振之

乾德元年春正月庚申遣山南東道節度使慕容延釗  
等率十州兵以討張文表二月壬辰湖南節度使周保



權遣將臬文表于朗陵市遂出軍澧州以拒王師保權  
兵潰還朗州甲午荆南節度使高繼沖請歸朝得州三  
縣十七三月戊寅慕容延釗克朗州擒周保權湖南平  
得州十四監一縣六十六夏四月庚寅鑿習戰池辛卯  
建隆應天曆成壬辰賞湖南立功將士癸卯辰錦敏等  
州歸順甲辰夏州李彝興遣使來貢是月泉州陳洪進  
幽張漢思代為留後五月乙丑廣大內秋七月甲戌釋  
周保權以為千牛衛上將軍己卯班重定刑統等書冬  
十月以高繼沖為武寧軍節度使十一月甲子有事南  
郊大赦改元百官上尊號十二月辛巳親王宰相樞密

使以下各進階勳爵邑自是郊祀行慶為定制甲申皇  
后王氏崩辛未改卜安陵于鞏縣是冬吳越錢俶南唐  
李煜泉州陳洪進各獻郊祀禮物萬計自是大禮並如  
之是歲諸州置通判以常參官知縣事節度使后守信  
高懷德王審琦張令鐸張光翰趙彥徽各罷宿衛兵權  
女真貢名馬及海東青

二年春正月辛巳諭郡國長吏勸農戊子罷范質為太  
子太傅王溥為太子太保魏仁浦為尚書左僕射庚寅  
以趙普為門下侍郎同中書門下平章事李崇矩為樞  
密使夏四月丁未朔置制舉三科不限官庶許直詣閣



門進狀乙卯葬昭憲杜太后孝明王皇后于安陵乙丑  
始置參知政事以薛居正呂餘慶爲之壬申徙永州諸  
縣民之蓄蠶者三百二十六家于縣之僻處不得復齒  
于鄉五月己卯知制誥高錫坐受賂貶辛巳宗正卿趙  
礪坐贓杖除籍六月己酉弟光義光美竝進秩子德昭  
授貴州防禦使秋七月辛卯詔翰林學士陶穀竇儀等  
舉堪爲藩郡通判者各一人不當者連坐九月乙未幸  
北郊觀稼冬十一月甲戌命忠武軍節度使王全斌爲  
西川行營前軍兵馬都部署武信軍節度使崔彥進副  
之將兵三萬出鳳州道江寧軍節度使劉光義亦爲西

川行營前軍兵馬都部署樞密承旨曹彬副之將兵二  
萬出歸州道以伐蜀明日宴諸將于崇德殿示川峽地  
圖授攻取方略賜賚有差是歲陝州饑遣使振之靈武  
饑轉涇粟以饗回鶻來貢

三年春正月乙酉蜀主孟昶降得州四十五縣一百九  
十八戶五十三萬四千三十有九二月壬寅朔日當食  
不食夏四月癸丑職方員外郎李岳坐贓棄市六月甲  
辰以孟昶爲中書令秦國公庚戌秦國公孟昶卒秋八  
月籍郡國驍勇兵補禁衛是歲于闐回鶻高麗來貢  
四年春二月長春節甘露降江寧府迄開寶甘露降凡



三三月癸未僧行勤等一百五十七人各賜錢三萬遊西域夏四月壬子罷光州貢鷹鷄五月甲戌光祿少卿郭玘坐贓棄市壬午澶州貢麥兩岐至六岐者百六十五本六月巳酉果州貢禾一莖十三穗冬十月辛酉朔命太常復二舞是歲于闐占城來貢

五年春正月甲寅王全斌崔彥進王仁贍竝坐伐蜀贖貨殺降貶丁巳賞伐蜀功曹彬劉光義等進爵有差二月乙丑以沈義倫爲樞密副使三月乙巳詔諸道舉部內官吏才德優異者丙午以趙普爲尚書右僕射兼門下侍郎同中書門下平章事丙辰五星聚奎夏六月戊

午朔日有食之秋七月巳酉名元水旱災戶今年租遂爲定制八月甲申河溢入衛州城九月壬辰倉部員外郎陳郾坐贓棄市是月夏州李彝興卒子克叡嗣冬十二月癸酉同平章事趙普母喪去位越三日起復是歲祥牂西南蕃來貢

開寶元年春正月甲午陝絳懷州饑振之二月立宋氏爲皇后三月詔曰造士之選非樹私恩世祿之家宜敦素業如聞黨與頗容竊吹文衡公器豈宜斯濫自今舉人凡關食祿之家委中書覆試是月有駟象自至京師夏五月以盛暑手詔諸州恤刑語在刑法志六月癸亥



宋史新編卷一  
詔荆蜀民祖父母父母在者子孫不得別財異居秋七月戊申北漢主劉鈞卒養子繼恩立八月戊辰命昭化軍節度使李繼勳等率兵伐北漢九月辛巳朔禁錢出塞癸未監察御史楊士達坐鞫獄濫殺棄市庚子李繼勳敗北漢兵于銅渦河巳酉北漢供奉官侯霸榮弒其主繼恩鈞養子繼元立冬十一月癸卯日南至有事南郊改元大赦百官上尊號十二月巳酉朔日有食之乙丑大食國來貢

二年春二月乙卯命昭化軍節度使李繼勳為河東行營前軍都部署侍衛步軍指揮使党進副之宣徽南院

使曹彬為都監棣州防禦使何繼筠為石嶺關部署進雄軍節度使趙贊為汾州路部署以伐北漢又命彰德軍節度使韓仲贊為北面都部署彰義軍節度使郭延義副之以防契丹戊午詔親征三月巳巳契丹主述律遇弒卒子賢立夏四月巳未何繼筠敗契丹援兵於陽曲五月癸未韓仲贊敗契丹於定州北閏五月壬子議班師六月癸巳帝至自太原冬十月庚寅散指揮都知杜延進等謀叛伏誅夷其族是歲王彥超武行德楊廷璋白重贊郭從義俱罷節鎮為諸衛上將軍西南夷回鶻于闐來貢



三年春正月辛酉詔民五千戶舉孝弟彰聞德行純茂者一人奇才異行不拘此限里閭郡國遞審連累以聞仍爲治裝詣闕三月辛亥賜處士王昭素國子博士致仕夏四月辛未朔日有食之秋九月己亥命潭州防禦使潘美爲貴州道兵馬行營都部署朗州團練使尹崇珂副之發十州兵以伐南漢冬十月庚辰克賀州十一月壬寅下昭桂二州乙巳詔曰古者不貴難得之貨後代賦及山澤上加侵削下益彫弊每念此事深疚于懷未能捐金於山豈忍奪人之利自今桂陽監歲輸課減三分之一癸丑右領軍衛將軍石延祚坐贓棄市癸亥

田欽祚敗契丹於遂城是歲女真來貢

四年春正月丁未右千牛衛大將軍桑進興坐贓棄市二月己丑潘美克廣州俘其國主劉鋹廣南平得州六十縣二百十四戶十七萬二百六十三夏四月丙寅前左監門衛將軍趙玘訴宰相趙普汝州安置壬辰監察御史閻丘舜卿坐贓棄市五月丁酉賞廣南功潘美尹崇珂等進爵有差六月壬午以孝子羅居通爲延州主簿封劉鋹爲恩赦侯冬十月癸亥朔日有食之庚午太子洗馬王元吉坐贓棄市十一月己未日南至有事南郊大赦壬戌蜀班內殿直四十人援御馬直例乞賞擢



登聞鼓帝命杖之翌日悉斬于營是歲三佛齊來貢  
五年春正月庚子前盧縣尉鄆陵許永年七十五自言  
父瓊年九十九兩兄皆八十餘乞一官以便養因召瓊  
厚賜之授永鄆陵令庚寅以劉熙古參知政事三月乙  
酉殿中侍御史張穆坐贓棄市夏五月辛未河決濮陽  
命潁州團練使曹翰往塞之語在河渠志甲戌以霖雨  
出後宮五十餘人六月河決陽武汴決穀熟害民田振  
之詔曰近者澶濮等數州霖雨荐降洪河爲患朕以屢  
經決溢重困黎元每閱前書詳究經瀆至若夏后所載  
但言導河至海隨山濬川未聞力制湍流廣營高岸自

戰國專利堙塞故道小以妨大私而害公九河之制遂  
隳歷代之患弗弭凡縉紳多士草澤之倫有素習河渠  
之書深知疏導之策若爲經久可免重勞竝許詣闕上  
書附驛條奏朕當親覽用其所長勉副詢求當示甄獎  
秋七月己未朔右拾遺張洵坐贓棄市九月丁巳朔日  
有食之癸酉李崇矩罷爲鎮國軍節度使是歲大饑高  
麗占城三佛齊來貢

六年春三月乙卯朔周鄭王殂于房州上素服發哀謚  
曰恭帝庚申覆試進士於講武殿乃賜第自是進士殿  
試遂爲定制乙亥翰林學士李昉坐知貢舉失當責授



太常少卿夏四月丁亥召開封尹光義天平軍節度使  
石守信等賞花習射於苑中丙午黎州保塞蠻來歸五  
月庚申劉熙古以戶部尚書致仕是月武寧軍節度使  
高繼沖卒六月庚戌詔參知政事與宰相趙普分知印  
押班奏事秋八月甲辰趙普罷爲河陽三城節度使九  
月丁卯呂餘慶罷爲尚書左丞巳巳封光義爲晉王進  
德昭同中書門下平章事薛居正爲門下侍郎同平章  
事沈義倫爲中書侍郎同平章事盧多遜參知政事壬  
申詔曰周之宗盟異姓爲後此先王所以睦九族而和  
萬邦也晉王親賢莫二位望俱崇方資夾輔之勳俾先

三事之列宜位宰相上冬十月甲申葬周恭帝于順陵  
不視朝十一月癸丑詔常參官進士及第者各舉文學  
一人十二月丙午參知政事盧多遜父喪起復行開寶  
通禮是歲占城交阯來貢交阯自此內附

七年春二月庚辰朔日有食之丙戌日有二黑子乙巳  
太子中舍胡德沖坐贓棄市夏六月丙申發粟振河中  
饑是月淮溢入泗州城安陽河溢竝壞民居秋八月戊  
子陳州貢芝草一本四十九莖九月癸亥命義成軍節  
度使曹彬爲西南路行營馬步軍戰權都部署山南東  
道節度使潘美爲都監潁州團練使曹翰爲先鋒都指



揮使將兵十萬出荆南以伐江南將行召曹彬潘美戒之曰城陷之日慎無殺戮設若困鬪則李煜一門不可加害冬十月甲子宰臣薛居正等上新編五代史十二月巳巳左拾遺劉祺坐受賂黥面杖配沙門島是歲南丹州蠻酋長莫洪誓內附占城大食三佛齊來貢

八年春正月乙酉帝御長春殿謂宰相曰朕觀爲臣者比多不能有終豈忠孝薄無以享厚福耶宰相薛居正等頓首謝三月巳亥契丹遣克沙骨慎思以書來結成夏五月甲午褒封丁璉父部領爲交陟郡王六月甲子彗出柳歷東壁二月乃滅秋七月辛未朔日有食之庚

辰遣閣門使郝崇信太常丞呂端使契丹八月壬戌契丹遣耶律霸德等致御衣玉帶名馬九月壬申狩近郊逐兔馬蹶墮地因引佩刀刺馬殺之旣而悔之曰吾爲天下主輕事畋獵又何罪馬哉自是遂不復獵冬十月辛亥詔郡國令佐察民有孝弟力田奇才異行或文武可用者遣詣闕十一月乙未曹彬克昇州俘國主李煜其相陳喬自經死江南平凡得州十九軍三縣一百八十戶六十五萬五千六十帝曰寓縣分割民受其禍攻城之際必有橫羅鋒刃者寔可哀也命出米十萬振之十二月甲子契丹遣使來賀正旦自是歲交遣使生辰



亦是歲大食三佛齋來貢

九年春正月乙亥封李煜爲違命侯庚辰詔郊西京曰  
定鼎洛邑我之西都燔柴泰壇國之大事况削平江表  
底定南方惟率土之混同自上天之鑒祐內慙涼德感  
是洪休得不罄以恭虔申其告謝睠維京而西顧兆陽  
位於南郊豆籩陳有楚之儀黍稷奉惟馨之薦朕今暫  
幸西京取四月內選日有事於園丘宜令有司各揚其  
職禮容儀衛典故在焉祇事肅成無或煩擾諸道州府  
不得以進奉爲名輒有率斂凡在中外當體予懷二月  
庚戌以曹彬爲樞密使己未吳越國王錢俶偕子惟濬

等來朝三月癸酉子德芳授貴州防禦使丙子帝幸西  
京夏四月庚子祀園丘大赦耆老相謂曰我輩少經亂  
離不圖今日復觀太平天子儀衛辛亥帝至自西京丙  
寅大食來貢六月乙卯熒惑入南斗秋八月辛丑太子  
中允郭思齊坐贓棄市丁未遣侍衛馬軍都指揮使党  
進宣徽北院使潘美率兵伐北漢九月庚午高麗來貢  
冬十月癸丑夕帝崩在位十七年年五十帝孝友節儉  
不事矯飾初頗好微行或諫其輕出曰帝王之興自有  
天命周世宗見諸將方面大耳者皆殺之我終日侍側  
不能害也旣而微行愈數有諫輒曰有天命者任自爲



之不汝禁也一日罷朝坐便殿不樂者久之左右請其故曰爾謂爲天子容易耶早作乘快誤決一事故不樂耳汴京新宮成御正殿坐令洞開諸門曰此如我心少有邪曲人皆見之吳越錢俶來朝自宰相以下咸請留俶而取其地帝不聽遣歸國及辭取羣臣留俶章疏數十軸封識遺俶戒以途中密觀俶感懼江南平遂乞納土南漢劉鋹好置醜以毒臣下旣歸朝從幸講武池帝酌卮酒賜鋹鋹疑捧杯泣曰臣罪在不赦陛下旣待臣以不死願爲大梁布衣觀太平之盛帝咲謂之曰朕推赤心於人腹中寧肯爾耶卽取鋹酒自飲別酌以賜鋹

王彥昇擅殺韓通雖預佐命終身不與節鉞王全斌貪恣殺降雖有大功卽加貶絀宮中葦簾緣用青布常服之衣澣濯至再魏國長公主襦飾翠羽敎之曰汝生長富貴當念惜福見孟昶寶裝溺器椿而碎之曰所爲如是可不亡何待晚好讀書嘗讀二典歎曰堯舜之罪四凶只從投竄何近代法網之密乎乾德三年蜀平蜀宮人入內帝見其鏡背有志乾德四年召竇儀等詰之對曰此必蜀物蜀主嘗有此號乃大喜曰作相須讀書人由是大重儒者受命杜太后傳位太宗太宗嘗病亟帝親爲灼艾太宗覺痛帝亦取艾自灸每對近臣言太宗龍



行虎步他日必爲太平天子福德吾所不及云太宗卽位之二年上尊諡曰英武聖文神德皇帝廟號太祖天禧元年加今諡

論曰唐太史令李淳風有言天之所命人不能違信哉周世宗鑒近代促運悉誅戮諸將豐貌者自謂無遺慮然天下竟歸於終日侍側之點檢此豈非天耶夫剝必復蹇必解五季之亂乃天悔禍時也宋太祖挺生寔應明宗之祝陳橋推戴夫烏得而辭諸逮天下既定傳位有盟先其弟而後其子雖素敦友于重違母命要之晉王知略孰與武功乎夫帝之心非利天下灼然著矣野

史氏乃言其興以謀又言晚渝盟故崩于弑皆弗綜其事實茲述本紀闕之母令開創賢辟蒙些言議焉

宋史新編卷一



宋史新編卷二

本紀二

明南京戶部主事莆田柯維騏編

太宗

太宗至仁應道神功聖德睿烈大明廣孝皇帝諱炅初名匡義改賜光義卽位之二年改今諱宣祖第三子也初杜太后夢神人捧日以授已而有娠遂以晉天福四年十月十七日生帝於浚儀官舍帝幼不羣及長隆準龍顏望之知爲大人工文業多藝能仕周至供奉官都知太祖卽位爲殿前都虞候領睦州防禦使親征澤潞帝以大內點檢留鎮尋領泰寧軍節度使征李重進爲



大內都部署加同平章事行開封尹再加兼中書令征太原改東都留守別賜門戟封晉王班宰相上開寶九年冬十月癸丑太祖崩帝卽位乙卯大赦詔先帝創業垂二十年事爲之防曲爲之制紀律已定物有其常謹當遵承不敢踰越庚申以弟廷美爲開封尹封齊王先帝子德昭封武功郡王德芳爲興元尹以盧多遜爲中書侍郎同中書門下平章事楚昭輔爲樞密使薛居正沈倫及中外官進秩有差十一月庚午詔諸道轉運使察州縣官吏能否第爲三等歲終以聞十二月己亥大赦改是歲爲太平興國元年己未幸講武池遂幸玉津

園自是歲屢幸

二年春正月丙寅禁居官出使者行商賈事辛未詔曰虞書考績爰及三年漢官奏課聿分九等應諸道州府曹掾及縣令簿尉先是吏部南曹給印紙曆子俾州縣長吏書其績用過僭秩滿有司詳視而差其殿最斯舊章也執事者其申明之母或蔽欺以紊經制是月開科取士帝嘗謂侍臣曰朕欲博求俊彥於科場中非敢望拔十得五止得一二亦可爲致治之具矣夏四月乙卯葬太祖于永昌陵五月癸亥向拱張永德張美劉廷讓皆罷節鎮爲諸衛上將軍甲戌以生日爲乾明節秋七



月庚午詔諸庫藏敢變權衡以取羨餘者死閏月巳酉  
河溢開封等八縣害稼八月陝澶道忠壽諸州大水九  
月辛亥幸講武臺大閱丙辰符近郊自是歲屢幸是月  
興州江水溢汴水溢濮州大水冬十月分左藏北庫爲  
內藏庫帝謂左右曰朕置內庫蓋慮司計之臣不能節  
約異時用度有闕復當賦率於民朕終不以此自供嗜  
好也十一月丁亥朔日有食之旣是歲泉州陳洪進吳  
越國王子錢惟濬來朝勃泥占城大食黎州兩林蠻來  
貢

三年春二月辛未幸崇文院三月乙酉朔貝州清河民

田祚十世同居詔旌門閭復其家巳酉吳越國王錢俶  
來朝是月壽州甘露降迄至道甘露降凡十有八夏四  
月巳卯陳洪進獻漳泉二州凡得縣十四戶十五萬一  
千九百七十八兵萬八千七百二十七辛巳侍御史趙  
承嗣坐監征欺隱棄市癸未以陳洪進爲武寧軍節度  
使同平章事五月乙酉錢俶獻兩浙諸州凡得州十三  
軍一縣八十六戶五十五萬六百八十兵一十一萬五  
千三十六丁亥封錢俶爲淮海國王是月夏州李克勗  
卒子繼筠嗣六月癸未詔職官贓罪雖會赦不得敘著  
爲令秋七月壬辰右千牛衛上將軍李煜卒戊戌金鄉



縣民李光襲十世同居詔旌其門壬子中書舍人李知古坐受賕改刑部所定法杖殺之八月癸丑滑州黃河清冬十月辛酉復曲阜襲封文宣公家十一月丙申祀天地于園丘大赦百官上尊號是歲占城高麗夷州蠻來貢

四年春正月庚寅命宣徽南院使潘美爲北路都招討制置使河陽軍節度使崔彥進彰德軍節度使李漢瓊彰信軍節度使劉遇桂州觀察使曹翰副之侍衛馬軍都虞候米信步軍都虞候田重進爲行營指揮使並將兵伐北漢以西上閣門使郭守文順州團練使梁迥監

護之辛卯命雲州觀察使郭進爲太原石嶺關都部署以防契丹癸巳置簽書樞密院事以石熙載爲之癸卯新渾儀成二月壬子幸國子監自是歲屢幸甲子帝親征北漢三月乙未郭進大破契丹援兵于關南夏四月庚戌以石熙載爲樞密副使辛未帝幸太原城五月甲申北漢主劉繼元降北漢平凡得州十縣四十戶三萬五千二百二十已丑以劉繼元爲右衛上將軍彭城郡公帝作平晉詩令從臣和辛卯劉繼元獻官妓百餘以賜將校六月庚申帝伐契丹秋七月癸未帝督諸軍及契丹戰于高粱河敗績自是和好遂絕語在遼國傳甲



申班師乙巳帝至自范陽是月夏州李繼筠卒弟繼捧嗣八月壬子西京留守石守信坐從征失律貶甲戌武功郡王德昭自殺冬十月乙亥賞平北漢功廷美進封秦王潘美等進秩有差是歲占城山後兩林蠻來貢五年春三月己丑左監門衛上將軍劉錕卒秋七月丁未以黎桓亂交州命蘭州團練使孫全興入作使張濬左監門衛將軍崔亮爲行營部署出邕州寧州刺史劉澄軍器庫副使賈湜閣門祇候王僎爲行營部署出廉州各以其衆致討冬十一月己酉帝伐契丹癸丑帝次關南與契丹戰大破之戊午諸軍及契丹大戰于莫州

敗績十二月乙酉帝至自大名府是歲交州黎桓兩遣使爲丁璿上表求襲位不報回鶻高麗西南蕃并諸州蠻來貢

六年春二月詔曰朝廷申勸懲之道立經久之規應羣臣掌事外州悉給御前印紙所貴善惡無隱殿最必書俾因滿秩之時用行考績之典如聞官吏頗紊綱條朋黨比周迭相容蔽朱鹽細碎妄有指言蠹有巨而不章勞雖微而必錄有司據文而校件析以聞志旣切於澄清恩或由於僥倖成命不返蓋示信以當然出令惟行於垂勸而安在宜行戒諭用儆因循自今應出使臣僚



在任日勞績非尤異者不得批書曾有殿犯不得引匿其餘經常事不在批書之限三月巳酉興元尹德芳薨壬戌交州行營破賊于白藤江口知邕州侯仁寶死之會炎瘴軍士多死者詔班師斬劉澄賈湜于軍中徵孫全興下獄夏六月甲戌同平章事薛居正卒秋九月乙未朔日有食之甲辰左拾遺田錫上疏極諫詔嘉獎之辛亥以趙普爲司徒兼侍中石熙載爲樞密使冬十一月丁酉監察御史張白坐贓棄市辛亥祀天地于園丘大赦百官上尊號丁巳孫全興以失律棄市辛酉楚昭輔罷爲左驍衛上將軍是歲高昌女真回鶻來貢

七年春正月壬戌詔定輿服等差及婚娶喪葬儀制三月癸巳朔日有食之乙未罷秦王廷美爲西京留守乙巳交州以王師致討遣使來謝夏四月甲子以竇儼郭贄竝參知政事柴禹錫兼樞密副使丁丑西京留守秦王廷美罷歸第同平章事盧多遜褫職流崖州并徙其家庚辰沈倫罷爲工部尚書五月巳酉夏州留後李繼捧歸朝獻銀夏綏宥四州丙辰秦王廷美降涪陵縣公房州安置六月乙亥遣使發李繼捧親屬赴闕其弟繼遷奔地斤澤秋七月甲午以子德崇封衛王德明封廣平郡王九月壬子契丹主賢卒子隆緒立冬十月巳卯



參知政事竇偁卒癸卯乾元曆成十一月己酉以李繼  
捧爲彰德軍節度使十二月戊午朔日有食之是歲淮  
漢諸水溢關陝諸州大水陽穀縣蝗占城獻馴象

八年春正月戊寅曹彬罷爲天平軍節度使己卯以王  
顯弭德超竝兼樞密副使二月戊子朔日有食之三月  
庚申以宋琪參知政事夏四月壬寅班外官戒諭辭壬  
子流弭德超于瓊州并徙其家五月丁卯交州黎桓自  
稱留後遣使來貢并上丁璿讓表詔不允語在交趾傳  
是月河決滑州過澶濮曹濟東南入于淮六月己亥以  
王顯爲樞密使己酉兗州太山父老及瑕丘等七縣民

請闕請封禪旦八月穀洛澶澗溢壞官民廬舍溺死者以  
萬計鞏縣壞殆盡秋七月辛未郭贄罷爲祕書少監庚  
辰以李昉參知政事八月庚戌石熙載罷爲尚書右僕  
射是月詔曰朕選用羣才并良衆職九品之賤一命之  
微未嘗專委於有司必須召對於便殿親與之語以勸  
其能倘敷納而可觀必越次而命賞靡容僥倖庶協澄  
清自今應親臨選擢官吏竝送中書更審內履歷別聽  
進止是秋河江漢滹沱睢諸水皆溢爲患冬十月戊戌  
改子德崇名元佐德明名元祐德昌名元休德嚴名元  
雋德和名元傑己酉進元佐爲楚王元祐陳王封元休



韓王元雋冀王元傑益王趙普罷爲武勝軍節度使十一月壬子朔以宋琪李昉並同中書門下平章事壬申以李穆呂蒙正李至並參知政事張齊賢王沔並同簽書樞密院事十二月滑州河復決是歲溪錦敘富四州蠻來附占城山後兩林蠻來貢

雍熙元年春正月壬戌購逸書丁卯前秦王廷美卒于房州癸酉參知政事李穆卒三月丁巳塞滑州決河帝作平河歌賜近臣蠲水所及州縣今年租是月十五日詔宰相近臣賞花於後苑帝曰春氣暄和萬物暢茂四方無事朕以天下之樂爲樂宜令侍從詞臣各賦詩帝

習射于水心殿夏四月乙酉泰山父老詣闕請封禪戊子羣臣三上表請許之五月丁丑乾元文明二殿災六月丁亥詔求直言壬寅詔罷封泰山冬十月甲申賜華山隱士陳搏號希夷先生癸巳嵐州獻牝獸一角并瑞物六十三種圖付史館十一月丁巳祀天地于圜丘大赦改元十二月壬辰立德妃李氏爲皇后丙申詔曰王者賜醕推恩與衆共樂所以表升平之盛事契億兆之歡心累朝以來此事久廢蓋逢多故莫舉舊章今四海混同萬民康泰嚴禋始畢慶澤均行宜令士庶之情共慶休明之運可賜京師醕三日是歲龜茲高麗來貢



二年春二月乙未夏州李繼遷誘殺汝州團練使曹光  
實夏四月乙亥朔遣使諸州振饑及察官吏能否丙子  
詔宰相以下宴後苑賞花釣魚命羣臣賦詩習射其後  
賞花曲宴遂爲故事己丑殿前承旨王著坐臧棄市秋  
八月癸酉朔遣使按問諸路刑獄仍察官吏勤惰以聞  
帝曰朕於獄犴之寄夙夜焦勞慮有冤滯耳九月庚戌  
楚王宮火辛亥廢楚王元佐爲庶人是月右羽林統軍  
周保權卒冬十月辛丑朔親錄京城繫囚遂至日旰近  
臣諫苦勞過甚帝曰儻惠乃無告使獄訟平允不致枉  
濫朕意深以爲適何勞之有詳見刑法志十一月壬午

待近郊詔曰夫順時蒐狩禮有舊章非樂畋遊將獻宗  
廟久隳前制缺孰甚焉爰遵時令暫狩近郊旣躬獲禽  
用以薦俎其今月十一日畋獵親射所獲田禽並付所  
司以備太廟四時薦享著爲令十二月庚子朔日有食  
之丙辰宋琪罷爲刑部尚書柴禹錫罷爲左驍衛大將  
軍是歲交趾占城西南蕃黎州邛部蠻來貢

三年春正月己丑知雄州賀令圖等請伐契丹取燕薊  
故地庚寅以天平軍節度使曹彬爲幽州道行營前軍  
馬步水陸都部署河陽三城節度使崔彥進副之彰化  
軍節度使米信爲西北道都部署沙州觀察使杜彥圭



副之率兵出雄州靜難軍節度使田重進爲定州路都  
部署率兵出飛狐戊戌李至罷爲禮部侍郎二月壬子  
命忠武軍節度使潘美爲雲應朔等州都部署雲州觀  
察使楊業副之出鴈門三月癸酉曹彬與契丹戰固安  
南克其城丁丑潘美追破于寰州其刺史趙彥辛以城  
降辛巳曹彬克涿州潘美圍朔州其節度副使趙希贊  
以城降癸未田重進戰飛狐北獲其招安使大鵬翼等  
乙酉曹彬敗契丹兵于涿州南殺其相賀斯丁亥潘美  
師至應州其節度副使艾正等以城降辛卯田重進攻  
飛狐其守將呂行德等以城降丙申進圍靈丘其守將

穆超以城降是月武寧軍節度使陳洪進卒夏四月己  
酉田重進戰飛狐北再破之殺其二將乙卯田重進至  
蔚州其牙校殺大將以城降五月庚午曹彬之師大敗  
于岐溝關丙子契丹十萬衆復陷寰州楊業力戰爲所  
獲死之六月戊戌朔日有食之甲辰以辛仲甫參知政  
事秋七月庚午曹彬崔彥進米信杜彥圭以失律貶丁  
亥張齊賢出知代州甲午詔改元祐名爲元僖元休爲  
元侃元雋爲元份八月丁酉以王沔張宏爲樞密副使  
丁未遣使振劍州饑因督捕諸州盜賊辛亥潘美以失  
律貶楊業追贈之冬十月甲辰以陳王元僖爲開封尹



庚申詔以交趾黎桓爲靜海軍節度使十二月壬寅瀛  
州部署劉廷讓與契丹戰君子館敗績先鋒將賀令圖  
被執別將楊重進死之是歲司門員外郎王延範等坐  
謀不軌棄市壽州大水濮州蝗占城高麗來貢

四年春三月庚辰詔申嚴考績夏四月巳亥張宏罷爲  
御史中丞以趙昌言爲樞密副使是月詔諸州郡暑月  
恤繫囚如開寶之令

端拱元年春正月乙亥親耕籍田大赦改元是月澶州  
黃河清二月庚子進封元僖許王元侃襄王元份越王  
李昉罷爲尚書右僕射以趙普呂蒙正並同中書門下

平章事王沔參知政事張宏爲樞密副使乙巳以楊守  
一簽書樞密院事庚戌子元偓封徐國公元偁封涇國  
公三月甲戌貶趙昌言爲崇信軍行軍司馬夏五月辛  
酉置祕閣帝謂祕書監李至曰朕無他好但喜讀書多  
見古今成敗善者從之不善者改之辛未感德軍節度  
使李繼捧賜姓趙名保忠明日改定難軍節度使秋八  
月戊寅鄧王錢俶卒庚辰幸國子監學官李覺講周易  
賜帛百匹九月乙酉簽書樞密楊守一卒冬十月詔罷  
游獵五坊所蓄鷹犬並放之諸州毋以爲獻十二月辛  
未以夏州蕃落使李繼遷爲銀州刺史充洛苑使是歲



宋史紀事本末卷三  
交趾高麗來貢

二年夏五月戊戌以旱慮囚遣使決諸道獄是夕雨秋七月甲申以張齊賢爲樞密副使張遜簽書樞密院事戊子彗出東井上避正殿減常膳八月丙辰大赦是夕彗滅冬十月辛未以歲旱彗星見詔曰朕以身爲犧牲焚於烈火亦未足以答謝天譴當與卿等審刑政之闕失稼穡之艱難恤物安人以祈玄祐十二月辛酉詔尊號去文武二字是歲三佛齊邛部蠻來貢

淳化元年春正月戊寅朔赦畿內改元受尊號改乾明節爲壽寧節戊子趙普罷爲西京留守夏四月甲寅詔

大臣各舉轉運使及知州通判五溪蠻田漢權來附六月庚午太白晝見秋七月丁丑太白復見冬十月乙丑知白州蔣元振知須城縣姚益恭竝以清幹聞下詔褒諭賜粟帛十一月戊戌太白晝見是歲京師諸路大饑河陽洪吉江蘄諸州大水振之占城高麗交趾西南蕃來貢

二年春二月癸丑盡易宮殿綵繪以赭聖監察御史祖吉坐贓棄市閏月辛未朔日有食之巳丑詔開封府捕京城蒲博犯者斬三月乙丑辛仲甫罷知陳州巳巳以歲蝗旱禱弗應手詔宰相朕將自焚以答天譴翌日雨



蝗盡死夏四月庚午罷端州貢硯辛巳張宏罷爲吏部侍郎以張齊賢陳恕竝參知政事張遜溫仲舒寇準竝爲樞密副使是月河溢虞鄉等七縣民饑五月庚子置諸路提點刑獄官丙辰左正言謝泌以敢言擢右司諫賜金紫錢三十萬六月乙酉汴水決浚儀縣帝親督衛士塞之秋七月巳亥詔陝西緣邊諸州饑民鬻子女入近界部落者官贖之李繼遷奉表請降以爲銀州觀察使賜姓趙名保吉八月巳卯置審刑院九月丁酉王沔罷爲戶部侍郎陳恕罷爲給事中巳亥呂蒙正罷爲吏部尚書以李昉張齊賢竝同中書門下平章事賈黃中

李沆竝參知政事帝飛白書玉堂之署賜翰林承旨蘇易簡癸卯王顯罷爲崇信軍節度觀察使甲辰以張遜知樞密院事溫仲舒寇準竝同知院事冬十一月乙巳罷京城內外力役土功十二月癸未保康軍節度使劉繼元卒是歲州郡三十二旱邛部蠻來貢女真乞師伐契丹不許自是不復通貢

三年春正月乙巳詔常參官舉可任升朝官者丙午詔宰相侍從舉可任轉運使者乙卯京師雨土語在五行志二月乙丑朔日有食之夏四月癸未上作刑政稼穡詩賜近臣五月丁未戶部郎中田錫殿中丞郭渭坐稽



留刑獄竝責州團練副使不簽署州事戊申命醫視京城病者賜錢五十萬具藥中黃門按視之六月辛卯置常平倉秋八月壬申召終南隱士種放不至冬十月詔諸道轉運使察舉所部官吏有治績者各以名聞當召對增秩其貪猥不職者竝備狀來上當行貶斥十一月巳亥許王元僖卒是歲許汝等八州蝗洛水溢潤州丹徒縣大饑闍婆占城高麗西南蕃來貢

四年春正月辛卯祀天地于園丘以宣祖太祖配大赦二月巳未朔日有食之壬戌雨雪大寒優恤城中民孤老貧窮者乙丑封交州黎桓爲交趾郡王巳卯以江浙

淮陝饑詔分遺近臣巡撫有可惠民者得便宜行事吏罷軟苛刻者上之詔令未便者附傳以聞丙戌青城民王小波聚衆爲亂殺彭山縣令齊元振夏六月丙寅張齊賢罷爲尚書左丞壬申寇準罷爲左諫議大夫張遜貶右領軍衛將軍以柴禹錫知樞密院事呂端參知政事劉昌言同知樞密院事秋八月丙辰朔日有食之九月丙午命侍從舉才堪五千戶以上縣令各二人自七月雨至是不止河溢壞澶州江溢陷涪州詔溺死者給歛具仍發廩以振冬十月辛未李昉罷爲尚書右僕射賈黃中李沆罷爲給事中溫仲舒罷爲右諫議大夫以



呂蒙正同中書門下平章事蘇易簡參知政事趙鎔向敏中竝同知樞密院事丁丑以趙昌言參知政事十二月戊申西川都巡檢使張玘與盜王小波戰死之小波中流矢死衆推其黨李順爲帥是歲高麗來貢

五年春正月癸酉命侍衛馬軍都指揮使李繼隆爲河西行營都部署討李繼遷甲戌命昭宣使王繼恩爲兩川招安使討李順二月巳酉元傑徙封吳王三月乙亥趙保忠爲趙保吉所龔奔還夏州指揮使趙光嗣執以獻李繼隆帥師入夏州夏四月甲申削趙保吉姓名五月丁巳西川行營破賊復成都獲李順語在王繼恩傳

李順黨張餘復攻陷八州開州監軍秦傳序死之丙寅封趙保忠宥罪侯庚辰初伏帝親書綾扇賜近臣六月戊申高麗乞師伐契丹不許秋七月乙亥李繼遷遣使來貢八月辛丑詔遣知益州張詠赴部得便宜從事九月壬申以襄王元侃爲開封尹改封壽王乙亥以寇準參知政事冬十一月丙辰賜近臣飛白書丙寅幸國子監賜直講孫奭緋魚因幸武成王廟復幸國子監令奭講尚書賜束帛十二月戊寅朔日當食雲陰不見侍臣稱賀是歲交趾大食來貢

至道元年春正月戊申朔改元赦畿內癸亥趙昌言罷



知鳳翔府戊辰劉昌言罷爲給事中以錢若水同知樞密院事甲戌李繼遷遣使以良馬橐駝來獻二月丙午嘉州函賊帥張餘首送西川行營其黨悉平夏四月癸未呂蒙正罷爲右僕射柴禹錫罷知涇州蘇易簡罷知鄧州以呂端同中書門下平章事張洎參知政事趙鎔知樞密院事乙酉契丹寇雄州甲辰開寶皇后宋氏崩六月乙酉購求圖書丙戌遣使諭李繼遷授鄜州節度使不奉詔秋八月壬辰詔立壽王元侃爲皇太子改名恒兼判開封府大赦文武常參官子爲父後者賜勳一轉癸巳以尚書左丞李至禮部尚書李沆並兼太子賓

客九月庚午李繼遷寇清遠軍冬十一月以峰州團練使上官正右諫議大夫雷有終並爲西川招安使召王繼恩歸闕是歲占城涼州吐蕃西南蕃犍牻諸蠻來貢詔封西南蕃王龍漢瑋爲歸化王

二年春正月辛亥祀天地于圜丘大赦二月庚辰以李昌齡參知政事夏四月甲戌命侍衛馬軍都指揮使李繼隆爲環慶等州都部署殿前都虞候范廷召副之將兵討李繼遷秋七月甲寅寇準罷爲給事中九月丙戌秦晉諸州地晝夜十二震冬十二月大有年是歲處州稻再熟



宋史新編卷二  
三年春正月丙子張洎罷爲刑部侍郎以溫仲舒王化  
基竝參知政事李惟清同知樞密院事乙酉葬孝章宋  
皇后于永昌陵二月辛丑帝不豫壬戌大食來貢三月  
丁卯占城來貢癸巳詔皇太子樞前卽位是日帝崩在  
位二十二年年五十九六月真宗上尊諡曰神功聖德  
文武皇帝廟號太宗天禧元年加今諡

論曰藝祖受禪十有七年次第削平諸國獨太原猶負  
固吳越漳泉未納土竟賴太宗之沉謀睿斷區宇混同  
雖不得志於幽燕而繼述之業亦云弘矣且畏天憫人  
好文納諫昭儉防淫所以循家法而培國基者日兢兢  
焉卒而五兵不試百穀屢豐非太平之效耶惜大行在  
殯不踰年改元宋后之崩不成喪涪陵武功竝不得其  
死謂先帝何嗚呼是無怪議者有疑於受遺之際也

宋史新編卷二



宋史新編卷三

本紀三

明南京戶部主事莆田柯維騏編

真宗

真宗膺符稽古神功讓德文明武定章聖元孝皇帝諱  
恒太宗第三子也母賢妃李氏是爲元德皇后乾德五  
年五星聚奎明年妃得異夢以十二月二日生帝于開  
封府邸赤光照室足左指有文成天字幼英傑姿表特  
異比就學受經一覽成誦初名德昌太平興國八年授  
檢校太保同中書門下平章事封韓王改名元休端拱  
元年封襄王改元侃淳化五年封壽王加太傅開封尹



至道元年立爲皇太子改今諱仍判府事故事殿廬幄  
次在宰相上宮僚稱臣皆推讓弗受見賓客李至李沆  
必先拜迎送降階及門開封政務填委帝留心獄訟京  
獄屢空太宗屢詔嘉美三年三月太宗崩帝卽位夏四  
月乙未尊皇后爲皇太后赦天下癸卯宰相呂端加右  
僕射弟元份元傑元偓元儼等竝進封有差甲辰  
以李至李沆竝參知政事丁未中外羣臣進秩一等乙  
卯進封交趾黎桓爲南平王五月甲戌參知政事李昌  
齡貶丁亥立郭氏爲皇后六月辛丑詔罷獻祥瑞乙巳  
錢若水請罷許之以爲集賢院學士是月追復涪王廷

美爲秦王復封兄元佐爲楚王秋八月己亥趙鎔罷爲  
壽州觀察使李惟清罷爲御史中丞以曹彬爲樞密使  
向敏中夏侯嶠竝爲樞密副使庚子以生日爲承天節  
己酉封乳母齊國夫人劉氏爲秦國延壽保聖夫人庚  
申西川廣武卒劉旰作亂掠諸州招安使上官正鈐轄  
馬知節討平之冬十月己酉葬太宗于永熙陵十二月  
丙申追尊母賢妃李氏爲皇太后辛丑詔諸路轉運使  
飭長吏勸農甲辰復趙保吉姓名授定難軍節度使  
咸平元年春正月丁丑召學官崔頤正講書因命宰臣  
選明經術者以聞甲申彗出營室北二月癸巳宰臣呂



宋史新編卷三  
端等言彗出之應當在齊魯分帝曰朕以天下爲憂豈直一方耶甲午詔求直言避殿減膳乙未慮囚丁酉彗滅三月復開進士諸科淳化末停貢舉者五年至是復焉夏四月壬寅趙保吉遣弟繼瑗入謝巳酉遣使按天下吏民逋負悉除之是月平戎軍甘露降迄天禧甘露降凡七十有一五月戊午朔日有食之六月辛卯詔近臣舉常參官才堪轉運使者丙辰以旱免開封二十五州軍田租秋九月壬申賜終南隱士种放粟帛緡錢冬十月丙戌朔日有食之戊子呂端罷爲太子太保李至罷爲武勝軍節度使以張齊賢李沆竝同中書門下平

章事巳丑溫仲舒罷知河陽夏侯嶠罷爲戶部侍郎以向敏中參知政事楊礪宋湜竝爲樞密副使丙午許羣臣獻著述令兩制銓簡十二月癸卯詔三司判官舉才堪知州者各一人是歲吐蕃首領來朝獻馬二千匹甘州回鶻西南蕃黎州山後蠻來貢定州雹傷稼振之二年春正月甲子詔侍從舉升朝官可守大郡者各一人二月巳酉戒百官比周奔競有弗率者御史臺糾之三月丁亥帝以久旱諭宰相曰凡政有闕失宜相規以道毋惜直言夏六月戊午樞密使曹彬卒秋七月甲申給外任官職田巳丑以王顯爲樞密使甲辰幸國子監



宋史新編卷三  
學官崔偓佺講尚書還幸崇文院各賜賚有差八月丙寅大閱於東北郊癸酉樞密副使楊礪卒九月庚辰朔日有食之是月契丹大舉入寇冬十月壬子宜州執溪峒蠻酋三十餘人詣闕詔釋其罪遣還十一月丙戌祀天地于圜丘以太祖太宗配大赦百官上尊號是月詔親征契丹所次頓舍給用毋泛及州縣以周瑩爲駕前軍都部署石保吉爲行營先鋒都部署魏咸信爲貝冀行營都部署李沆爲東京留守十二月甲寅駕發京師甲子次大名躬御鎧甲於中軍契丹攻威虜軍本軍擊敗之是歲沙州蕃族首領邛部川蠻西南蕃占城大食

來貢江浙廣南荆湖旱嵐州春霜害稼竝振之

三年春正月癸未契丹犯河間高陽關都部署康保裔死之乙酉忠武軍節度使傅潛都鈐轄張昭允竝坐失律削官流遠州丁亥高陽關貝冀路都部署范廷召等追敗契丹於莫州壬辰樞密副使宋湜卒甲午益州兵亂害鈐轄符昭壽逐知州牛冕等推都虞候王均爲首詔戶部使雷有終爲瀘州觀察使兼川峽招安使會巡檢使李惠等討之庚子帝至自大名府二月辛酉詔從臣各舉升朝官才堪邊任者一人癸亥王顯罷知定州以周瑩王繼英竝知樞密院事王旦同知樞密院事丁



卯益州王均開城僞遁雷有終等入城兵敗退保漢州  
李惠死之丙子賞花苑中召從臣宴射帝作賞花釣魚  
詩從臣皆賦三月戊寅朔日有食之夏四月乙卯葬元  
德李皇后于永熙陵冬十月雷有終大敗賊黨復益州  
王均走死有終等進秩有差十一月壬午詔羣臣盡言  
無諱常參官轉對如故事未預次對者聽封事以聞丙  
申張齊賢罷爲兵部尚書十二月戊申狩近郊以所獲  
獻廟歲以爲常是歲大食高麗高州蠻來貢畿內江南  
荆湖旱果閬州水竝振之

四年春二月丙寅詔從臣各舉賢良方正直言敢諫一

人三月丁丑風霾帝謂宰相曰卿等思闕政以佐予治  
李沆等乞免官不許庚寅以呂蒙正向敏中竝同中書  
門下平章事司天監進儀天曆辛卯王化基罷知揚州  
以王旦參知政事馮拯陳堯叟竝同知樞密院事夏四  
月巳未以王欽若參知政事五月戊子亳州貢白兔還  
之六月癸卯汰天下冗吏十九萬六千人丁卯詔頒九  
經于州縣學校及聚徒講誦之所戊申出陣圖示宰相  
命督將練士以備北邊秋八月戊申以契丹謀入寇出  
地圖險要示宰相議戰守方略九月趙保吉復叛陷清  
遠軍冬十一月壬申知階州竇玘獻白鷹還之鎮定高



陽關都部署王顯奏契丹入寇大破之十二月丙寅太白晝見南斗是歲丹眉流龜茲撫水州蠻來貢夏州蕃族訛遇等先後內附河北饑梓州水竝振之

五年春正月壬戌環慶部署張凝襲焚諸蕃族帳二百斬首五千降千人三月丁酉趙保吉陷靈州知州裴濟死之庚戌比部員外郎洪湛坐同王欽若知舉事敗流儋州工部尚書趙昌言知雜御史范正辭竝坐故入欽若貶夏五月代州進士李光輔善擊劔詣闕帝曰若獎用之民悉好劔矣遣還六月己卯周瑩罷爲高陽關都部署是月都城大雨壞廬舍振恤壓死者之家秋七月

甲午朔日有食之八月乙酉河西蕃族拽浪南山等四百人內附九月戊申召隱士种放授左司諫賜第宅冬十月辛巳涇原部署請誅內屬蕃族數叛者九十人詔釋之丁亥向敏中罷爲戶部侍郎十一月壬寅祀天地于圜丘大赦是歲沙州來貢六谷首領潘羅支等貢馬第給其直河北饑振之

六年春二月庚辰以六谷酋長潘羅支爲朔方軍節度使甲申蕃部葉市族囉埋等內附庚寅屯田員外郎盛梁坐受賕枉法流崖州三月綏州東山蕃部軍使拽白等內附夏四月契丹來侵戰望都縣副都部署王繼忠



被執以歸五月甲午太白晝見秋七月癸丑堯王元傑卒八月庚午太白晝見辛未原渭等州言西蕃八部二十族納質來附九月甲辰呂蒙正罷為太子太師冬十一月癸巳苦寒令諸路休役兵庚戌雨木冰甲寅有星孛于井鬼十二月趙保吉攻西涼知府丁維清沒焉是歲三佛齊大食西涼府暨龍野馬族來貢河北諸州大

熟

景德元年春正月丙戌朔元大赦丙申京師地震辛丑再震丁未又震二月潘支集蕃部擊趙保吉敗之保吉中流矢死羅支使來捷於是保吉子德明立三

月威虜軍守將破契丹斬獲甚衆己亥皇太后李氏崩夏五月丁巳詔諸路轉運使代還日悉條所經畫事以聞六月壬午暑甚罷京城工役遣使賜暍者藥秋七月丙戌同平章事李沆卒庚寅以畢士安參知政事八月己未以畢士安寇準並同中書門下平章事王繼英為樞密使馮拯陳堯叟並簽書樞密院事壬申詔常參官二人共舉州縣官可任幕職者一人九月己丑詔翰林學士承旨宋白等舉文武官可任藩郡者各一人丁酉以契丹入寇召宰相議親征閏月乙亥以參知政事王欽若判天雄軍兼都部署契丹統軍撻覽率衆攻威虜



順安軍三路都部署擊敗之斬偏將獲其輜重又攻北平砦及保州復爲州砦兵所敗撻覽與契丹主及其母并衆攻定州王師拒於唐河擊其游騎契丹駐陽城淀因王繼忠致書于莫州石普以講和冬十一月丙寅遣使安集河北流民庚午車駕北巡司天言日抱珥黃氣充塞契丹宜不戰而却甲戌寒甚左右進貂帽毳裘却之曰臣下皆苦寒朕安用此王繼忠數馳奏請和帝謂宰相曰河冰已合且其情多詐不可不爲之備契丹兵至澶州北直犯前軍西陣其大帥撻覽耀兵出陣俄中伏弩死丙子帝次澶州渡河戊寅閣門祗候曹利用使

契丹還十二月庚辰朔日有食之契丹使韓杞來甲申契丹使姚東之來獻御衣食物曹利用竟以歲幣三十萬定和議甲午帝發澶州乙未契丹使丁振以誓書來丁酉契丹兵出塞戊戌帝至自澶州是歲交趾蒲端占城大食龜茲來貢江南東西路饑陝濱棗州蝗振之二年春正月庚戌朔以契丹講和大赦天下壬子放河北諸州強壯歸農令有司市耕牛給之二月乙酉以交趾有內難遣使安撫癸卯遣太子中允孫僅等使契丹夏四月丁酉樞密直學士劉師道貶忠武軍行軍司馬右正言知制誥陳堯咨貶單州團練使竝坐知舉不公



癸卯王欽若罷爲資政殿學士以馮拯參知政事五月  
戊申幸國子監秋七月甲子詔復賢良方正能直言極  
諫等六科八月戊寅雍王元份卒辛丑有星孛于紫微  
冬十月乙酉同平章事畢士安卒丙戌遣職方郎中韓  
國華等使契丹十一月戊申詔侍從舉堪爲學官者十  
人丁巳祀天地于圜丘大赦癸亥宰相寇準親王元佐  
等悉進爵有差癸酉契丹遣使來賀承天節自是生辰  
交遣使歲爲常十二月癸未契丹遣使來賀明年正旦  
自是正旦交遣使歲爲常是歲夏州西涼府邛部川蠻  
來貢淮南兩浙荆湖北路饑京東蝻生閩颶風振之

三年春正月辛未置常平倉二月丁亥樞密使王繼英  
卒戊戌寇準罷爲刑部尚書以王旦同中書門下平章  
事己亥以王欽若陳堯叟竝知樞密院事趙安仁參知  
政事韓崇訓馬知節竝簽書樞密院事三月己未詔儆  
諫臣悉心獻替夏四月丙子幸崇文院五月壬寅日當  
食不虧周伯星見己未渭州妙娥族三千帳內附復置  
高州是月知樞密院事陳堯叟父喪起復六月丙子知  
廣州凌策請發兵定交趾亂帝命遵前詔安撫秋七月  
壬子緣海安撫使邵晔上邕州至交趾水陸路及控制  
宜州山川等圖帝曰祖宗闢土廣大惟當慎守不必貪



無用地苦勞兵力八月甲戌閱太常新集雅樂九月乙丑夏州趙德明奉表歸款冬十月庚午以趙德明爲定難軍節度使封西平王丁酉葬明德李皇后于永熙陵十一月壬寅周伯星再見是歲西涼府高溪州風琶溪峒諸蠻酋來貢京東西河北陝西饑振之

四年春正月己未車駕發京師丁卯帝素服詣諸陵二月己巳帝幸西京甲戌幸上清宮詔賜酺三日丁酉賜隱士楊璞繪帛三月己亥帝至自西京夏四月辛巳皇后郭氏崩五月丙申朔日有食之閏月丙戌詔兵部尚書張齊賢等各舉供奉官侍禁殿直有謀略武幹知邊

事者二人六月丁未司天言五星聚而伏於鶉火乙卯葬莊穆郭皇后于永熙陵秋七月甲戌宜州軍校陳進殺知州劉永規劫判官盧成均爲首詔閤門使曹利用等將兵討之辛巳以黎龍廷爲交阯郡王賜名至忠是月帝謂宰臣曰朕慮四方刑獄官吏未盡得人一夫受冤卽召災沴今軍民事務惟有轉運使且地遠無由知先帝嘗選朝臣爲諸路提點刑獄官今可復置仍以使臣副之八月庚子韓崇訓罷爲齊州防禦使壬寅幸崇文院丁巳權三司使丁謂上景德會計錄冬十月甲午朔日當食雲陰不見曹利用破賊擒盧成均斬陳進賞



宋史新編卷三  
立功將士有差乙巳頒試進士新格詔翰林學士晁迥  
等舉常參官可知大藩者二人乙卯毀諸道官司非法  
訊囚之具是歲河西六谷夏州沙州大食占城蒲端西  
南蕃溪峒蠻來貢諸路大熟淮蔡間麥斗十錢粳米斛  
二百

大中祥符元年春正月乙丑有天書見左承天門鷓尾  
帝召羣臣拜迎于朝元殿語在禮志戊辰大赦改元賜  
京師酺幽州旱求市麥種夏州饑請易粟竝許之三月  
兗州父老千餘人并詣路進士文武官將校蠻夷耆壽  
僧道先後詣闕請封禪不允自是表凡五上夏四月甲

午詔以十月有事于泰山乙未以知樞密院事王欽若  
參知政事趙安仁爲封禪經度制置使丙申以宰相王  
旦爲封禪大禮使知樞密院事陳堯叟參知政事馮拯  
分掌禮儀使丙午作昭應宮五月壬戌王欽若言泰山  
醴泉出錫山蒼龍見六月乙未天書再降于泰山醴泉  
北辛亥羣臣上尊號秋八月乙巳黔州言磨嗟洛浦蠻  
首領龔行滿等率族二千三百人內附己酉王欽若獻  
芝草八千餘本九月戊午岳州進三春茅庚辰趙安仁  
獻五色金玉丹紫芝八千七百餘本冬十月庚寅五星  
順行同色辛卯駕發京師扶侍使奉天書先道戊申王



欽若等獻泰山芝草三萬八千餘本巳酉五色雲起嶽  
頂辛亥饗昊天上帝於圓臺陳天書於左以太祖太宗  
配玉牒文曰有宋嗣天子臣某敢昭告于昊天上帝啓  
運大同惟宋受命太祖肇基功成治定太宗膺圖重熙  
累盛粵惟冲人不承列聖寅恭奉天憂勤聽政一紀于  
茲四隩來暨丕貺殊尤元符章示儲慶發祥清淨可致  
時和年豐羣生成遂仰荷顧懷敢忘繼志僉議大封聿  
申昭事躬陟喬嶽對越上玄率禮祇肅備物吉蠲以仁  
守位以孝奉先祈福逮下侑神昭德惠綏黎元懋建皇  
極天祿無疆靈休允迪萬葉其昌永保純錫壬子禪社

首如封祀儀日重輪五色雲見作會真宮癸丑受羣臣  
朝賀大赦百官加恩賜天下酺三日十一月戊午幸曲  
阜謁文宣王廟遂幸孔林加孔子謚追謚齊太公曰昭  
烈武成王青州立廟周文公曰文憲王曲阜立廟丁卯  
賜曲阜孔子廟經史丁丑帝自泰山奉天書還宮十二  
月辛卯御乾元殿受尊號辛丑宰相王旦親王元佐等  
悉進爵越二日王欽若張齊賢溫仲舒寇準王化基邢  
昺竝進秩有差是歲契丹西涼府甘州三佛齊大食西  
南蕃等遣使來賀東封諸路言歲稔米斗七八錢  
二年春正月癸亥以封禪慶成賜宗室輔臣襲衣金帶



器幣庚午詔讀非聖之書及屬辭浮靡者嚴譴之三月  
丙辰朔日當食陰晦不見辛未賜京城酺夏四月壬寅  
詔禁中外羣臣非休暇無得羣飲廢職五月乙卯追封  
孔子弟子七十二人六月甲午幸昭應宮戊戌麟府言  
社慶族依唐龍鎮爲援數擾別部請出兵襲之帝曰均  
吾民也不許秋七月甲寅詔右僕射張齊賢等各舉才  
堪御史者一人辛未以昭應宮爲玉清昭應宮冬十一  
月丙辰作文武七條戒官吏甲子詔諸路官吏蠹政害  
民轉運使提點刑獄不舉察者坐之十二月辛丑三司  
使丁謂上封禪朝覲祥瑞圖內臣劉承珪上天書儀仗

圖是歲于闐西涼府西南蕃羅崑州蠻來貢雄濟鳳三  
州水雄州蟲兗州霖雨無爲軍大風昇州火竝振之  
三年春三月壬辰交趾大校李公蘊自稱留後因封交  
趾郡王夏四月辛酉賜泰山隱士秦辨號貞素先生放  
還山甲戌宰相王旦知樞密院事王欽若陳堯叟竝進  
秩五月壬午西涼府覓諾族瘴疫賜藥六月庚戌邊臣  
言契丹饑來市糴詔雄州糴粟二萬石振之河中府父  
老千餘人詣闕請祀后土不允秋七月文武官將校等  
三上表請祀汾陰后土八月丁未朔詔明年春有事于  
汾陰戊申以知樞密院事陳堯叟爲祀汾陰經度制置



使巴西以宰相王旦爲大禮使知樞密院事王欽若爲  
禮儀使九月丁亥作宗室座右銘賜諸王甲辰內出綏  
撫十六條頒江淮南安撫使冬十月辛亥契丹遣使耶  
律寧來告征高麗十一月己亥陝州黃河清十二月陝  
州黃河再清庚戌集賢校理晏殊獻河清頌辛酉謁玉  
清昭應宮己巳帝作奉天庇民述示宰相是歲龜茲占  
城交阯來貢江淮旱陝西饑疫昇洪潤州火竝振之  
四年春正月丁酉帝奉天書發京師二月戊申華州獻  
芝草辛酉祀后土地祇是夜月重輪壬戌大赦賜天下  
酺三日作汾陰配饗銘河瀆四海贊召草澤李瀆劉巽

瀆以疾辭授巽大理評事庚午召見隱士鄭隱李寧賜  
茶藥東帛壬申宴虢州父老于湖城行宮三月甲戌次  
陝州召草澤魏野辭疾不至己卯次西京丙申謁諸陵  
夏四月甲辰朔帝至自汾陰是月宰相親王以下進秩  
有差五月癸巳詔州城置孔子廟乙未加上五嶽帝號  
作奉神述六月丙寅詔授交甘等州大食蒲端三麻蘭  
勿巡等國貢使官秋七月甲午馮拯罷知河南府冬十  
月丁巳定江淮鹽酒價有司慮失歲課帝曰苟便於民  
何顧歲入也十一月庚午占城貢獅子是歲江淮南水  
畿內蝗楚秦州潮害稼京兆旱河北陝西劔南饑振之



五年春正月戊寅雨水冰壬午河決棣州三月庚戌宰相王旦等竝加特進功臣夏四月戊申以向敏中同中書門下平章事有司請違法販茶者許同居首告帝謂以利敗俗非國體不許五月戊子賜近臣金華殿所種麥六月庚申賜杭州隱士林逋粟帛秋八月丙申朔日有食之己未作五嶽觀九月戊子趙安仁罷爲兵部侍郎以王欽若陳堯叟竝爲樞密使馬知節爲樞密副使丁謂參知政事冬十月戊午延恩殿道場帝瞻九天司命天尊降是爲聖祖令天下避聖祖諱玄爲元朗爲明凡載籍偏犯者各缺其點畫寺以玄元聲相近諱玄爲

真改玄武爲真武己未大赦辛酉作崇儒術論刻石國學閏月己巳上聖祖尊號乙亥上聖祖母懿號丙子羣臣上尊號戊寅建景靈宮太極觀於壽丘十一月甲辰百官悉加恩置玉清昭應宮使以王旦爲之丁未作汴水發願文十二月戊辰作景靈宮丁亥立德妃劉氏爲皇后是歲交趾甘州西涼府溪峒蠻來貢江淮兩浙夏旱遣使就福建取占城早稻種教民種之諸路饑減直鬻穀以濟流民

六年春正月癸巳朔司天言五星同色戊申禁內臣出使預民政己酉賜京師酺五日夏五月乙卯參知政事



丁謂奉迎建安軍所鑄玉皇聖祖太祖太宗尊像至帝  
展謁奉安於玉清宮六月丁卯壽丘獻紫莖金芝秋七  
月癸卯禁有司稅農器己酉亳州官吏父老詣闕請謁  
太清宮許之八月辛酉以丁謂爲奉祀經度制置使庚  
午加號太上老君混元上德皇帝冬十月癸酉謁玉清  
昭應宮己卯作步虛詞付道門十一月癸丑賜御史臺  
九經諸史甲寅判亳州丁謂獻芝草三萬七千本十二  
月戊午朔日有食之壬申獻天書於朝元殿是歲戎瀘  
蠻寇平龜茲西蕃高州蠻來貢

七年春正月壬寅帝奉天書幸亳州丙午判亳州丁謂

獻白鹿一芝九萬五千本己酉朝謁太清宮是夜月重  
輪含譽星見庚戌賜酺三日丙辰建應天府爲南京作  
鴻慶宮二月庚申夏州趙德明遣使詣行闕朝貢辛酉  
帝至自亳州壬申恭謝天地大赦三月甲午宰相親王  
竝進秩丁未子受益封慶國公夏四月丙子舒王元偁  
卒六月丙辰眉州通判董榮受賊鬻獄長安知縣王文  
龜酗酒濫刑竝投荒裔乙亥罷王欽若爲吏部尚書陳  
堯叟爲戶部尚書馬知節爲潁州防禦使以寇準爲樞  
密使秋七月辛丑交趾李公蘊敗鶴柘蠻遣使來獻捷  
甲辰以王嗣宗曹利用竝爲樞密副使八月甲戌河決



澶州九月丙戌合譽星再見辛卯尊上玉皇聖號曰太  
上開天執符御歷含真體道玉皇大天帝辛丑幸五嶽  
觀冬十一月玉清昭應宮成加王旦脩宮使十二月癸  
丑朔日當食不虧丙辰詔王欽若等五人各舉京朝幕  
職州縣官詳練刑典曉時務任邊寄者二人己未作元  
符觀是歲夏州西涼府高麗女真來貢河南府獄空淮  
南江浙饑除其租天下戶九百五萬五千七百二十九  
口二千一百九十七萬六千九百六十五

八年春正月壬午朔謁玉清昭應宮奉安刻玉天書于  
寶符閣還御崇德殿受賀赦天下文武官滿三歲者許

考課以闡夏四月辛酉帝製崇儒術爲君難爲臣不易  
二論賜輔臣刻石國子監壬戌寇準罷爲武勝軍節度  
使以王欽若陳堯叟並爲樞密使五月壬午榮王元儼  
因事奪節降封端王六月己酉朔日有食之閏月己卯  
赦天下秋七月戊午王嗣宗罷爲大同軍節度使冬十  
二月辛卯子受益進封壽春郡王是歲賜信州道士張  
正隨號真靜先生高麗東女真注輦回鶻占城唵廝囉  
西蕃來貢坊州大雨河溢陝西饑

九年春正月丙辰置會靈觀使以丁謂爲之加刑部尚  
書壬申以左諫議大夫張士遜左司諫崔遵度爲壽春



郡王友二月甲午詔以皇子就學之所名資善堂延州  
蕃部饑貸以邊穀三月丙午秦州曹瑋撫捍蕃境得宜  
詔嘉之乙丑著作郎高濤以贓賄杖脊配沙門島夏四  
月庚辰周伯星見丙申賜天下酺秋七月丙寅詔天下  
羣官職田並須遵守元制無擾客戶遇災沴卽蠲省之  
八月丙戌陳堯叟罷爲右僕射九月甲辰丁謂罷爲平  
江軍節度使丙午以陳彭年王曾張知白並參知政事  
甲寅詔督諸道捕蝗丁巳詔罷諸營造戊辰青州飛蝗  
赴海死積海岸百餘里己巳定出粟振饑補官之制是  
歲夏州甘州西蕃工部山後蠻來貢諸州大水隕霜害

稼並振之

天禧元年春正月辛丑朔改元詣玉清昭應宮薦獻上  
天皇大天帝寶冊袞服壬寅上聖祖寶冊己酉上太廟  
謚冊辛亥謝天地于南郊大赦御天安殿受冊號乙卯  
作欽承寶訓述示羣臣二月丁丑詔曰朕大庇蒸民隆  
興至治彌綸闕失交屬於庶僚寤寐思賢屢頒於明詔  
雖增虛佇未協翹思夫惟諫諍之臣迨于風憲之列倘  
因循而自默則獻納以曷觀况朕躬攬萬機日披封奏  
詳延百執素靡漏言舉職徇公有何所避保身箝口詎  
至於斯將戒慢官用申誕告仍加優異以勸傾輸自今



兩省置諫官六員御史臺中丞知雜推直外置御史六員並不兼領職務每月添支錢十五貫三年內不得差出其或詔令乖當官曹涉私措置失宜刑賞踰制賦斂繁暴犴獄稽留竝令諫官奏論憲臣彈舉每月須一員奏事或有急務亦許非時入對雖言有過當必示曲全若事難顯行卽令留內但不得潛爲朋附故作中傷其諫官仍於諫院或兩省內選擇廳事竝置什器候及三年或屢有章疏實能裨益特越常例別與升遷苟或職業無聞公言罔親移授散秩仍遣監臨載念古賢不忘忠諫雖逢暴怒尚靡諂辭今則沖人渴聞讜論開懷而

待好爵斯縻是爲不諱之朝豈有犯顏之慮黜陟之典斷在於必行語默之端亟從於自擇更資宰府宣布周行戊寅宰相親王以下悉進秩壬午定宗室子授官之制庚寅封交趾李公蘊爲南平郡王秦州神武軍大破宗哥族馬波叱臘等於野吳谷巳亥參知政事陳彭年卒秋七月丁巳王旦罷爲玉清昭應宮使八月庚午以王欽若爲左僕射兼中書侍郎同平章事九月癸卯王曾罷爲禮部侍郎以李迪參知政事馬知節知樞密院事曹利用任中正周起竝同知樞密院事冬十一月辛丑曹瑋平鬼留家族乙卯大雪帝謂宰相曰雪固豐稔



之兆第民力未充慮失播種卿等其務振勸毋遺地利  
十二月丙寅京城雪寒罷工役給貧民粥瘞死者是歲  
三佛齊龜茲來貢諸路蝗蝻戎軍風雹害稼並振之  
二年春正月辛亥賜壽春郡王卹民歌二月丁卯壽春  
郡王加太保進封昇王詔近臣舉常參官堪爲御史者  
夏閏四月癸卯馬知節罷爲彰德軍觀察留後丁未靈  
泉出京師飲者愈疾作祥源觀是月辰州討下溪州蠻  
斬獲甚衆五月壬戌詔諸州長吏存卹孝弟力田者甲  
子徐王元偓卒丁卯釋下溪州蠻彭儒猛罪六月乙巳  
訛言帽妖至京師民夜叫譟達曙詔捕嘗爲邪法人耿

槩等棄市辛亥彗出北斗魁秋八月甲辰立昇王爲皇  
太子更名禎大赦百官加恩壬子進封元儼通王以李  
迪兼太子賓客癸丑作元良箴賜皇太子九月庚辰賜  
京師酺冬十二月張知白罷知天雄軍是歲占城甘州  
溪峒黎州山後蠻來貢河北京東西饑振之

三年春三月戊午朔日有食之癸未翰林學士錢惟演  
坐知舉失實降一官夏六月甲午王欽若罷判杭州戊  
戌以寇準爲中書侍郎同平章事丁謂參知政事秋七  
月壬申以得天書羣臣表上尊號八月丁亥大赦冬十  
一月辛未祀天地于圓丘大赦十二月辛卯宰相向敏



中寇準竝進秩元儼進封涇王曹利用丁謂竝爲樞密使癸巳以任中正周起竝爲樞密副使是歲富州蠻酋向光澤表納土詔却之高麗女真來貢河決滑州泛溢諸縣江浙及利州路饑竝振之

四年春正月乙丑以曹瑋簽書樞密院事庚午贈處士魏野官賜其家粟帛二月帝不豫三月巳卯同平章事向敏中卒夏四月乙酉西南方雨月重見六月丙申寇準罷爲太子太傅秋七月辛酉京城大雨水壞廬舍大半丙寅以李迪爲吏部侍郎兼太子少傅同平章事馮拯爲樞密使庚午以丁謂馮拯竝同中書門下平章事

癸酉入內都知周懷政伏誅丁丑賊寇準爲太常卿八月乙酉以任中正王曾竝參知政事壬寅貶寇準爲道州司馬九月巳未周起罷知青州曹瑋罷爲環慶路都部署是月大赦賜京城酺冬十月甲辰減水災州縣秋租十一月戊午召近臣於龍圖閣觀御製文詞帝曰朕聽覽之暇以翰墨自娛雖不足垂範亦平生游心於此戊辰丁謂罷知河南府李迪罷知鄆州巳巳詔丁謂赴中書視事庚午詔自今除軍國大事親決餘皆委皇太子同宰相樞密使參議行以丁謂兼太子少師馮拯兼少傅曹利用兼少保十二月乙酉皇太子親政丁亥帝



不豫是歲龜茲甘州回鶻來貢

五年春正月丁酉以張士遜爲樞密副使二月甲寅審  
刑院言天下無斷獄丙寅賜天下酺秋七月甲戌朔日  
有食之八月壬戌熒惑犯南斗是歲吐蕃唃廝囉來降  
高麗來貢蠲京東西淮浙水災民租

乾興元年春正月辛未朔改元二月庚子大赦癸卯羣  
臣上尊號戊午帝大漸遺詔皇太子於柩前卽位帝是  
日崩在位二十六年年五十五十月仁宗上尊諡曰文  
明武定章聖元孝皇帝廟號真宗慶曆七年加今諡  
論曰真宗承昇平之業黎氓樂生久不識兵革一旦契

丹內侵我師弗利遂大舉乘晦抵澶州逼門庭矣帝用  
寇準謀親帥六師濟河決戰音兒禡其氣以歲幣定盟各  
罷兵詩曰徐方旣同天子之功帝之謂也抑帝之深思  
長慮詎保黠虜不吾叛耶遼史紀契丹之獵也手接飛  
鴈鴝自投于地稱曰天賜祭告而夸耀之帝之崇奉天  
書蓋陰寓制禦之術然其費無藝而國用爲竭豈策之  
得哉豈策之得哉



宋史新編卷三

宋史新編卷四

本紀四

仁宗

明南京戶部主事莆田柯維騏編

仁宗體天法道極功全德神文聖武睿哲明孝皇帝諱  
禎初名受益真宗第六子也母宸妃李氏是爲章懿皇  
后大中祥符三年四月十四日生帝于宮中章獻皇后  
無子取爲己子養之天性仁孝寬裕喜愠不形於色七  
年封慶國公八年封壽春郡王天禧元年兼中書令明  
年二月進封昇王八月立爲皇太子四年真宗詔五日  
一開資善堂太子秉笏南嚮立聽輔臣參決諸司事乾



興元年春二月戊午真宗崩帝卽位尊皇后爲皇太后  
權處分軍國事己未大赦百官進秩一等優賞諸軍山  
陵諸費毋賦于民庚申命宰臣丁謂爲山陵使乙丑以  
生日爲乾元節丙寅進封元儼定王宰相丁謂馮拯樞  
密使曹利用悉進秩戊辰貶寇準爲雷州司戶參軍李  
迪爲衡州團練副使曹瑋爲左衛大將軍寇準竟卒貶  
所三月庚寅初御崇德殿太后設幄次于承明殿垂簾  
以見輔臣夏六月己酉命參知政事王曾按視山陵皇  
堂庚申入內內侍省押班雷允恭坐擅移山陵皇堂伏  
誅丁謂罷分司西京丙寅任中正罷知鄆州秋七月甲

子朔日食幾盡辛未以王曾爲中書侍郎同中書門下  
平章事呂夷簡魯宗道參知政事丙子以錢惟演爲樞  
密使辛卯貶丁謂爲崖州司戶參軍八月乙巳皇太后  
同御承明殿垂簾聽政冬十月己酉葬真宗于永定陵  
以天書徇十一月丁卯錢惟演罷知河陽乙亥以皇太  
后生日正月八日爲長寧節辛巳開經筵命侍講孫奭  
馮元講論語壬午以張知白爲樞密副使是歲遣使契  
丹告哀及卽位契丹亦遣使來弔祭及賀卽位其賀生  
辰及明年正旦自是亦歲交遣使如先朝故事交趾來  
貢唵廝囉立遵求內附蘇州水滄州海潮溢爲患振之



天聖元年春正月癸未命三司節浮費遂立計置司三月辛卯司天監上崇天曆夏四月丁巳詔近臣舉諫官御史各一人秋九月丙寅馮拯罷判河南府以王欽若爲門下侍郎同中書門下平章事冬十一月戊午置益州交子務是歲甘沙州來貢甘露降迄嘉祐甘露降凡十有七

二年夏五月丁亥朔日當食不食秋八月己卯幸國子監直講馬龜符等賜賚有差遂幸武成王廟冬十一月丁酉祀天地于圜丘大赦百官上尊號及皇太后尊號賜百官諸軍加等乙巳立郭氏爲皇后是歲龜茲甘肅

來貢

三年夏五月癸巳幸御莊觀割麥聞民舍機杼聲賜織婦茶帛己亥賜隱士林逋粟帛六月癸酉環原州屬羌叛寇邊都監趙士禛等死之冬十月辛酉以晏殊爲樞密副使十一月戊申同平章事王欽若卒十二月癸丑以張知白同中書門下平章事乙丑以張旻爲樞密使是歲龜茲甘州于闐來貢環慶蕃部嵬逋等內附襄州水晉絳陝解州饑竝振之

四年夏五月壬午詔曰朕念生齒之蕃抵冒者衆法有高下情有輕重而有司巧避微文一切致之重辟豈稱



朕好生之志哉其令天下死罪情理可矜及刑名疑慮者具案以聞有司毋得舉駁己亥詔士有文而行不副者州郡毋得薦送閏月戊申減江淮歲漕米五十萬石除舒州太湖等九茶場民逋錢十三萬緡冬十月甲戌朔日有食之十二月丁亥帝白太后欲元日先上太后壽乃受朝太后不可宰臣王曾奏曰陛下以孝奉母儀太后以謙全國體請如太后令帝不從是歲郵延蕃部首領曹守貴等內附京師大雨水京東西淮南河北等路建劔邵武等州軍竝水災振之

五年春正月壬寅朔初率百官上皇太后壽于會慶殿

遂御天安殿受朝己未晏殊罷爲刑部侍郎戊辰以夏竦爲樞密副使二月丙子詔振京東流民夏五月癸亥楚王元佐卒是月京畿旱六月甲戌祈雨丙子詔決畿內繫囚丁丑雨癸未罷諸營造之不急者秋七月振秦州水災塞滑州決河冬十一月丁酉朔以陝西旱蝗蠲民租癸巳祀天地于圜丘大赦是歲甘州交趾來貢六年春二月壬午同平章事張知白卒三月丙申朔日有食之是月以張士遜同中書門下平章事姜遵范雍竝爲樞密副使夏四月癸未命官減三司歲調上供物五月乙未朔交趾寇邊秋八月乙丑詔免河北水災州



軍秋稅乙亥河決澶州是歲甘州三佛齊來貢

七年春正月癸卯曹利用罷丙辰降利用爲左千牛衛  
上將軍二月庚申朔參知政事魯宗道卒丙寅張士遜  
罷知江寧府以呂夷簡同中書門下平章事丁卯以夏  
竦薛奎並參知政事陳堯佐爲樞密副使癸酉貶曹利  
用爲崇信軍節度房州安置未至自殺閏月壬子詔曰  
朕開數路以詳延天下之士而制舉獨久不設意者吾  
豪傑或以故見遺也其復置此科乃增其名爲六又增  
高蹈丘園沉淪草澤茂才異等科復置書判拔萃科及  
試武舉三月辛巳詔振契丹流民分送唐鄧等州以閒

田處之夏四月辛卯交趾李公蘊子德政遣使告哀以  
德政爲交趾郡王五月庚申詔戒文弊六月丁未大雷  
雨玉清昭應宮災甲寅王曾罷知兗州秋七月癸亥以  
玉清昭應宮災詔天下不復繕脩乙酉罷諸宮觀使八  
月丁亥朔日有食之辛卯夏竦復爲樞密副使陳堯佐  
王曙並參知政事冬十月丙午詔知州軍歲舉判司簿  
尉可縣令者一人十一月癸亥冬至率百官上皇太后  
壽乃受朝祕閣校理范仲淹先期上疏言天子奉親于  
內自有家人禮不宜與百官同列而朝不報已而復疏  
請皇太后還政亦不報仲淹出通判河中是歲河北水



遣使振恤察官吏貪暴不恤民者龜茲下溪州黔州蠻來貢

八年夏五月甲寅賜信州道士張乾曜號澄素先生秋八月丙戌詔詳定鹽法九月乙丑樞密副使姜遵卒巳以趙稹爲樞密副使冬十一月戊辰祀天地于園丘大赦是歲高麗占城邛部川都蠻來貢

九年夏四月乙巳閏大樂六月庚辰翰林學士宋綬上皇太后儀制是月契丹主隆緒卒子宗真立秋七月丙午朔契丹使來告哀遣使吊祭及賀卽位遂爲故事冬十月詔公卿大夫勵名節翰林學士宋綬坐上書忤皇

太后出知應天府十一月丁酉出知雜御史曹脩古御史郭勸楊偕推直官段少連是歲龜茲沙州來貢女真晏端等百八十四人內附

明道元年春二月癸卯宰臣呂夷簡上三朝寶訓丙午詔仕廣南者毋過兩任以防貪黷庚戌復以張士遜同中書門下平章事丁卯宸妃李氏薨秋七月丁酉太白晝見彌月乃滅八月丙午以晏殊參知政事甲寅以楊崇勳爲樞密副使壬戌大內火延八殿乙丑求直言丁卯大赦冬十一月甲戌以脩內成大赦改元巳卯冬至率百官賀皇太后乃受朝壬辰延州言夏主趙德明卒



宋史新編卷四  
癸巳封德明子元昊爲西平王十二月壬寅以楊崇勳  
爲樞密使是歲京東淮南江東饑振之

二年春二月戊戌彗見東北方乙巳以將有事籍田皇  
太后服袞衣儀天冠饗太廟皇太妃亞獻皇后終獻是  
日上皇太后尊號丁未躬耕籍田大赦百官上尊號三  
月庚午加恩百官甲午皇太后劉氏崩遺詔尊皇太妃  
爲皇太后夏四月壬寅追尊母宸妃李氏爲皇太后壬  
子帝親政裁抑僥倖中外大悅癸丑召還宋綬范仲淹  
已未罷呂夷簡判澶州張耆判許州夏竦知許州陳堯  
佐知永興軍范雍知荆南府趙稹知河中府晏殊知江

寧府以李迪同中書門下平章事王隨參知政事李諮  
爲樞密副使王德用簽書樞密院事六月甲午朔日有  
食之秋七月戊子詔以旱蝗去尊號許中外直言闕政  
八月壬寅作奉慈廟冬十月癸巳朔太白犯南斗丁酉  
葬莊獻明肅劉皇后莊懿李皇后于永定陵戊午張士  
遜罷判河南府楊崇勳罷判許州以呂夷簡爲門下侍  
郎同中書門下平章事王曙爲樞密使宋綬參知政事  
王德用蔡齊竝爲樞密副使十一月癸亥朔太白犯南  
斗薛奎罷判都省甲戌贈寇準中書令十二月甲辰以  
京東饑出內藏絹二十萬代民歲輸乙卯廢皇后郭氏



御史中丞孔道輔率諫官范仲淹等大呼殿門請對丙  
辰出道輔仲淹仍詔臺諫自今毋相率請對丁巳詔改  
明年元是歲天下五路蝗四路饑振之注輦來貢  
景祐元年春正月甲戌詔執政大臣議兵農可更制者  
以聞甲申以淮南饑出內藏絹二十萬代歲輸二月戊  
申詔麟府州振蕃漢饑民三月壬午免諸路災傷州軍  
今年夏稅夏五月丁卯禁民間錦繡服飾西川歲貢錦  
亦罷之秋七月甲寅河決澶州八月壬戌有星孛于張  
翼癸亥樞密使王曙卒庚午以王曾爲樞密使冬十一  
月己丑立曹氏爲皇后是歲趙元昊反寇環慶交趾獻

馴象二詔還之

二年春正月癸丑置邇英延義二閣寫尚書無逸篇于  
屏二月戊辰李迪罷知亳州以王曾爲門下侍郎同中  
書門下平章事王隨李諮竝知樞密院事蔡齊盛度竝  
參知政事王德用韓億竝同知樞密院事三月戊申出  
內庫珠助三司經費自是歲如之夏四月庚午詔天下  
有知樂者所在薦聞五月甲午徭獠寇雷化州詔桂廣  
會兵討之秋九月壬寅按集賢校理李照等新樂巳酉  
作睦親宅冬十一月戊子廢后郭氏薨乙未祀天地于  
圜丘大赦錄五代及諸國後百官上尊號十二月詔長



吏能導民脩水利闢荒田者賞之是歲育宗室子宗實于宮中

三年春正月壬辰追復郭氏爲皇后丁酉葬郭皇后二月丙辰命官較鎮東推官阮逸布衣胡瑗等新樂三月戊戌詔曰致仕官舊皆給半俸而未嘗爲顯官者或貧不能自給豈所以遇高年養廉恥也其大兩省太卿監正刺史閣門使已上致仕者自今給俸如分司例仍歲時賜羊酒米麪令所在長吏常加存問夏四月己酉朔日當食不食五月丙戌天章閣待制范仲淹坐譏刺大臣落職知饒州集賢校理余靖館閣校勘尹洙歐陽脩

並落職補外詔戒百官越職言事秋八月乙卯月犯南斗九月癸酉熒惑犯南斗冬十一月戊寅保慶皇太后楊氏崩十二月丙寅樞密副使李諮卒丁卯以王德用知樞密院事章得象同知樞密院事是歲交趾西南蕃來貢南丹州蠻莫淮戟內附虔吉州水災振之

四年春二月己酉葬莊惠楊皇后于永定陵夏四月甲子罷呂夷簡判許州王曾判鄆州宋綬爲尚書左丞蔡齊爲戶部侍郎以王隨爲門下侍郎同中書門下平章事陳堯佐同中書門下平章事盛度知樞密院事韓億程琳石中立竝參知政事王黼同知樞密院事六月戊



子出神武祕略賜邊臣秋八月甲戌越州水賜被溺家  
錢冬十二月并代沂州地大震壓者數萬家遣使存恤  
是歲唵廝囉龜茲沙州來貢

寶元元年春正月戊戌朔日有食之三月戊戌朔罷王  
隨判河陽陳堯佐判鄭州韓億爲工部侍郎石中立爲  
戶部侍郎以張士遜爲門下侍郎同中書門下平章事  
章得象同中書門下平章事王濬李若谷並參知政事  
王博文陳執中並同知樞密院事是月以安化蠻寇宜  
融州發邵澧潭三州駐泊兵討之夏四月癸酉同知樞  
密院王博文卒乙亥以張觀同知樞密院事六月己卯

建州大水賜被溺家錢八月庚辰熒惑犯南斗冬十月  
丙寅詔戒百官朋黨十一月庚戌祀天地于園丘大赦  
改元百官上尊號十二月甲子京師地震己卯以趙元  
昊反命知未興軍夏竦兼涇原秦鳳路安撫使知延州  
范雍兼鄜延環慶路安撫使是歲交趾李德政進封南  
平王黎州蠻來貢

二年春正月辛亥安化蠻平癸丑趙元昊表請稱帝改  
元夏四月丁亥募民入粟實邊五月癸巳詔近臣舉方  
略材武之士各二人壬子王德用罷爲武寧軍節度使  
以夏守贊知樞密院事六月壬戌詔省浮費自乘輿服



御及宮掖所須宜從簡約若吏兵祿賜母槩行裁減壬午削趙元昊官爵除屬籍秋七月戊午夏竦移知涇州與范雍各加兼經略使馬步軍都總管冬十一月戊子朔出內庫珠估緡錢三十萬賜三司上諭輔臣曰此無用之物不若散之民收其直助糴邊儲亦可少紓吾民之斂也丁酉盛度罷知揚州程琳罷知潁州出御史中丞孔道輔壬寅以王黼知樞密院事宋庠參知政事是歲益梓夔利路饑出內帑振之曹濮單州蝗

康定元年春正月丙辰朔日有食之是月元昊寇延州執副都總管劉平石元孫二月丁亥以夏守贊爲陝西

都總管兼經略安撫使尋兼招討使辛卯月太白俱犯昴辛丑出內藏緡錢八十萬陝西市糴邊儲丙午改元許中外臣庶上封章言事癸丑范雍貶知安州是月以知制誥韓琦安撫陝西召知越州范仲淹知永興軍三月丙辰詔大臣條陝西攻守策丙子大風晝暝黑祲夕見東南丁丑罷大宴詔中外言闕政戊寅罷王黼知河南府陳執中知青州張觀知相州以晏殊宋綬知樞密院事王貽永同知樞密院事詔按察官舉才堪將帥者夏四月丙午鄜延路兵馬都監黃德和坐棄軍腰斬五月壬戌張士遜以太傅致仕以呂夷簡爲門下侍郎同



中書門下平章事戊寅以夏竦爲陝西經略安撫招討使以韓琦范仲淹副之召夏守贊還是月元昊陷塞門安遠砦兵馬押監王繼元死之六月丁亥以夏守贊同知樞密院事秋七月乙丑遣使以討元昊告契丹八月戊申夏守贊罷判澶州以杜衍同知樞密院事是月以范仲淹兼知延州九月甲寅滑州河溢戊午李若谷罷提舉會靈觀以宋綬晁宗慤參知政事鄭戩同知樞密院事戊辰以晏殊爲樞密使王貽永杜衍鄭戩並爲樞密副使是月元昊寇三川砦都巡檢楊保吉死之連陷乾溝乾福趙福三堡環慶路馬步軍副都總管任福破

白豹城冬十二月癸未出內藏絹一百萬助糴軍儲癸卯參知政事宋綬卒戊申鑄當十錢權助邊費

慶曆元年春二月元昊寇渭州副總管任福大敗于好水川韓琦貶知秦州三月范仲淹貶知耀州夏四月甲申以陳執中同陝西安撫經略招討使五月辛未宋庠罷知揚州鄭戩罷知杭州以王舉正參知政事任中師任布爲樞密副使六月乙巳詔近臣舉河北陝西河東知州通判縣令秋七月戊午月掩南斗是月元昊寇麟府州八月元昊寇金明砦破寧遠砦陷豐州兵馬押監王顯孫吉知州王餘慶死之冬十月罷夏竦判河中陳



執中知陝州詔罷都部署分陝西爲四路各置使以韓琦王沿范仲淹龐籍爲之十一月丙寅祀天地于園丘大赦改元是歲湖南洞蠻知徽州首領來貢

二年春正月丁巳復京師權鹽法癸亥詔磨勘院凡諸路提點刑獄到闕分功罪三等聞奏以待黜陟二月乙未詔河北強壯刺手背爲義勇軍三月甲辰詔武臣舉將才辛酉晁宗慤罷爲給事中巳巳契丹遣蕭英劉六符來致書求割地夏四月庚辰知制誥富弼報使契丹五月戊午建大名府爲北京乙丑罷左藏月進錢千二百緡謂輔臣曰此周官所謂供王之好用者朕宮中無

所費其斥以賜縣官戊辰禁銷金爲服飾是月契丹集兵幽州聲言來侵河北京東皆爲邊備六月癸酉朔日有食之甲戌出內藏銀紬絹三百萬助邊費秋七月丙午任布罷知河陽府戊午大雨雹以呂夷簡兼判樞密院事章得象兼樞密使晏殊加同平章事癸亥富弼再使契丹定議增歲幣共五十萬九月丙午呂夷簡改兼樞密使乙丑契丹遣耶律仁起劉六符持誓書來閏月元昊寇定川砦涇原路馬步軍副都總管葛懷敏戰沒元昊大掠渭州而去冬十月丙辰知制誥梁適報使契丹丙寅契丹遣使再致誓書報徹兵十一月辛巳復置



陝西路經略安撫招討使命韓琦范仲淹龐籍分領之  
甲申以泰山處士孫復爲國子監直講是歲占城來貢  
三年春正月辛巳詔輔臣議蠲減天下賦役癸巳元昊  
自名曩霄遣人納款稱夏國二月丙午賜陝西招討韓  
琦范仲淹龐籍錢各百萬辛酉立四門學三月戊子呂  
夷簡罷爲司徒以章得象晏殊竝兼樞密使夏竦爲樞  
密使賈昌朝參知政事夏四月戊戌朔幸瓊林苑閱騎  
士癸卯遣使報曩霄許冊封及歲幣十萬匹茶三萬斤  
甲辰以韓琦范仲淹爲樞密副使乙巳夏竦至京師罷  
還本鎮以杜衍爲樞密使五月丁卯朔日有食之帝以

春夏不雨親禱于西太一宮是日雨秋七月丙子王舉  
正罷知許州八月丁未以范仲淹參知政事富弼爲樞  
密副使癸丑韓琦宣撫陝西九月丁卯召輔臣對天章  
閣乙亥任中師罷知永興軍冬十月壬戌頒新定磨勘  
式詔曰考課之法舊矣祥符之際治致升平凡下詔條  
全務寬大考最則有限年之制入官則有循資之格及  
此事邊因緣多故數披官簿審閱周行思得應務之才  
無虧素餐之道非賞勸衆志不激勵非甄別人情不憤  
悱具申凡目著于甲令詳見選舉志甲子築水洛城是  
月光化軍亂討平之十一月丁亥詔曰周大司樂掌學



政以六藝教國子則官材蓋本於世胄而今之蔭法推  
恩太廣以致踈宗蒙澤稚齒授官未知立身之道從政  
之方而竝階仕進非所以審爵重民也其著爲令使夫  
冢嗣先錄以篤爲後之體支子限年以明入官之重設  
考課之格立保任之條古不云乎爵祿者天下之砥石  
人君所以礪世而磨鈍咨爾庶位體茲意焉是月五星  
皆在東方十二月丁巳大雨雪木冰河北雨赤雪是歲  
桂陽監徭蠻屢寇邊交趾安化蠻來貢

四年春正月乙亥荆王元儼卒辛卯太常禮院上新脩  
禮書及慶曆祀儀二月丙申出奉宸庫銀三萬兩下陝

西博糴穀麥以濟饑民三月乙亥詔曰儒者通天地人  
之理明古今治亂之原可謂博矣然學者不得騁其說  
而有司務先聲病章句以拘牽之則吾豪雋奇偉之士  
何以奮焉士以純明朴茂之美而無教學養成之法使  
與不肖竝進則夫懿德敏行何以見焉此取士之甚敝  
而學者自以爲患夫遇人以薄者不可責其厚也今朕  
建學興善以尊大夫之行更制革敝以盡學者之才有  
司其務嚴訓導精察舉以稱朕意學者其進德脩業無  
失其時其令州若縣皆立學本道使者選部屬官爲教  
授員不足取於鄉里宿學有道業者已卯出御書治道



宋史新編卷四  
三十五事賜講讀官夏五月壬申幸國子監賜直講孫復五品服遂幸武成王廟戊寅振淮南饑六月壬子范仲淹宣撫陝西河東秋七月戊寅大封宗室八月甲午富弼宣撫河北九月庚午晏殊罷知潁州甲申以杜衍同中書門下平章事兼樞密使賈昌朝爲樞密使陳執中參知政事冬十月庚寅以曩霄上表稱臣乞和賜誓詔歲賜銀絹茶絲凡二十五萬五千十一月戊午朔日當食不食已巳詔戒朋黨相訐及按察恣爲苛刻文人肆言行怪者壬午冬至祀天地于圜立大赦十二月乙未封曩霄爲夏國主是歲宜州蠻歐希範叛發兵討之

桂陽蠻降黎州邛部川山前山後蠻首領來貢

五年春正月乙酉范仲淹罷知邠州富弼罷知鄆州丙戌杜衍罷知兗州以賈昌朝同中書門下平章事兼樞密使王貽永爲樞密使宋庠參知政事吳育龐籍竝爲樞密副使二月辛卯詔罷京朝官用保任敘遷法又罷蔭補限年法癸卯以久旱詔州縣毋得淹繫刑獄三月辛酉韓琦罷知揚州甲子宜州蠻賊歐希範平夏四月丁亥朔日有食之雲陰不見戊申章得象罷知陳州以陳執中同中書門下平章事兼樞密使庚戌以吳育參知政事丁度爲樞密副使冬十月庚辰罷宰臣兼樞密



使是歲曩霄初遣使來賀正旦及乾元節西南夷施州溪峒蠻來貢

六年春三月辛巳朔日有食之帝謂宰相賈昌朝曰人主懼天而脩德猶人臣畏法而自新昌朝頓首謝夏四月丙寅以久旱民多暵死命京城增鑿井四百秋八月癸酉以吳育爲樞密副使丁度參知政事冬十月辛未湖南徭賊入寇詔發兵討之是歲交趾邈川首領喃斯囉西蕃瞎躡磨躡角安化州蠻蒙光速等來貢

七年春正月己亥頒慶曆編敕三月癸未詔天下有能言寬恤民力之事者有司驛置以聞癸巳以旱避殿減

膳求直言乙未賈昌朝罷判大名府吳育罷爲給事中丁酉以夏竦爲樞密使文彥博參知政事高若訥爲樞密副使辛丑祈雨西太乙宮還遂雨夏五月己亥放天下逋負冬十一月戊戌冬至祀天地于圜丘大赦貝州卒王則據城反語在明鎬傳是歲西蕃磨躡角來貢八年春正月丁丑文彥博宣撫河北明鎬副之閏月辛丑貝州平戊申以文彥博同中書門下平章事將士有功者遷擢有差辛酉親從官顏秀等四人夜入禁中謀爲變伏誅二月癸酉夏國來告曩霄卒子諒祚立己卯賜瀛莫恩異州緡錢贖還饑民鬻子三月甲寅幸龍圖



天章閣詔輔臣曰西陲備禦兵冗賞濫罔知所從卿等  
各以所見條奏又詔翰林學士三司使知開封府御史  
中丞曰朕躬闕失左右朋邪中外險詐州郡暴虐法令  
有不便於民者朕欲聞之其悉以陳癸亥以朝政得失  
兵農要務邊防備豫將帥能否財賦利害錢法是非與  
夫讒人害政姦盜亂俗乃防微杜漸之策召知制誥諫  
官御史等諭之使悉對于篇夏四月己巳朔封諒祚爲  
夏國主壬申丁度罷判尚書都省以明鎬參知政事五  
月辛酉夏竦罷判河南府以宋庠爲樞密使龐籍參知  
政事六月丙子河決澶州商胡埽甲午參知政事明鎬

卒秋七月戊戌以河北水災令州縣募饑民爲軍冬十  
一月壬戌發廩振畿內貧民十二月乙丑朔以霖雨爲  
災頒德音改明年元赦天下出內藏錢帛賜三司買粟  
以濟河北流民是歲合肥縣稻再實交趾來貢

皇祐元年春正月甲午朔日有食之以水災罷上元燈  
樂二月丁卯禁出虛戊辰以河北疫遣使頒藥秋八月  
壬戌陳執中罷知陳州以宋庠同中書門下平章事龐  
籍爲樞密使高若訥參知政事梁適爲樞密副使九月  
乙巳廣源州蠻儂智高反寇邕州是歲大留國來貢  
二年春正月癸卯以歲饑罷上元觀燈三月詔曰祖宗



親郊合祭天地祖宗並配百神從祀今祀明堂正當親郊之期而禮官所定祭天不及地祇配坐不及祖宗未合三朝之制且移郊爲大饗蓋亦爲民祈福宜合祭皇地祇奉太祖太宗真宗並配而五帝神州亦親獻之日月河海諸神悉如園丘從祀之數乃以秋九月辛亥行事大赦百官進秩一等自是明堂行慶爲定制冬十一月己未詔后妃之家母得除二府職任時太常薦太子中舍致仕胡瑗同阮逸等定鑄鍾特磬帝復命官詳定丁卯詔曰朕聞古者作樂本以薦上帝配祖考三五之盛不相襲沿然必太平始克明備周武受命至成王

時始大合樂漢初亦沿舊樂至武帝時始定泰一后土樂詩光武中興至明帝時始改大予之名唐高祖造邦至太宗時孝孫文收始定鐘律明皇方成唐樂是知經啓善述禮樂重事須三四世聲文乃定國初亦循用王朴竇儼所定周樂太祖患其聲高遂令和峴減一律真宗始議隨月轉律之法屢加按覈然念樂經久墜學者罕專歷古研覃亦未完緒頃雖博加訪求終未有知聲知經可信之人嘗爲改更未適茲意中書門下其集兩制及太常禮樂官以天地五方神州日月宗廟社蜡祭享所用登歌宮縣審定聲律是非按古合今調諧中和



使經乂可用以發揚祖宗之功德朕何憚改爲但審聲  
驗書二學鮮並互詆曾臆無所援據慨然希古靡忘于  
懷是月出內藏緡錢四十萬紬絹六十萬下河北便糴  
芻糧先是河北頻年水災朝廷蠲民稅幾盡至秋禾稼  
將登而鎮定復大水並邊尤被其害上憂軍儲不給故  
有是舉是歲占城沙州西南蕃唃廝囉瞎氍來貢

三年春二月丙戌宰臣文彥博等進皇祐大饗明堂記  
三月庚申宋庠罷知河南府以劉沆參知政事夏四月  
癸未詔河北流民相屬吏不加恤乃飾廚傳交賂使客  
以取名譽自今非犒設兵校其一切禁之五月乙亥班

簡要濟衆方于州縣六月丁亥知無爲軍茹孝標獻芝  
草帝曰朕以豐年爲瑞賢臣爲寶草木虫魚之異奚足  
尚哉姑免孝標罪戒州郡自今勿復獻秋七月丁巳兩  
制禮官上大樂名曰大安冬十月庚子文彥博罷知許  
州以龐籍同中書門下平章事高若訥爲樞密使梁適  
參知政事王堯臣爲樞密副使十二月庚辰新作渾儀  
是歲遣使安撫諸路饑民涇原樊家族密廝歌內附  
四年夏五月儂智高圍廣州命知桂州陳曙率兵討之  
六月丁亥以狄青爲樞密副使秋九月丁巳命余靖提  
舉廣南兵甲經制盜賊事庚午以狄青宣撫荆湖路提



舉廣南經制盜賊事冬十月太白犯南斗十一月壬寅朔日有食之十二月壬申陳曙討智高敗績狄青斬曙以徇己丑雪初帝以愆亢責躬宰相龐籍等請避賢路帝曰朕誠不能感天心非卿等過也是夕乃得雪是歲廣東兵馬鈐轄張忠蔣偕廣西兵馬鈐轄王正倫知英州蘇緘俱爲智高所殺河北路及鄜州水振之

五年春正月以廣南用兵罷上元張燈是月狄青大敗智高于邕州智高遁去二月癸未狄青復爲樞密副使夏四月甲午命劉沆梁適監議大樂五月乙巳高若訥罷判尚書都省以狄青爲樞密使丁未以孫沔爲樞密

副使秋七月乙巳詔曰比者湖北歲儉發常平以濟饑者如聞司農寺復督取豈朝廷振恤意哉其悉除之己酉詔薦舉非其人者御史臺彈奏見任監司以上弗許薦論閏月壬申龐籍罷知鄆州以陳執中梁適竝同中書門下平章事九月乙酉御崇政殿觀新樂冬十月丙申朔日有食之十一月己巳祀天地于園丘大赦戊子放天下逋負是冬禁轉運官進羨餘是歲占城來貢至和元年春正月壬申京城疫出珍劑療之癸酉貴妃張氏薨追冊爲后二月壬戌孫沔罷知杭州以田况爲樞密副使三月己巳王貽永罷爲景靈宮使以王德用



爲樞密使庚辰以太史言日當食四月朔下德音改元  
夏四月甲午朔日有食之秋七月丁卯以程戡參知政  
事戊辰梁適罷知秦州明日出御史馬遵呂景初吳中  
復八月丙午以劉沆同中書門下平章事是歲融州大  
丘洞楊光朝內附

二年春三月丙子始封孔子後爲衍聖公夏四月己亥  
契丹遣使求御容辛亥定差衙前法六月戊戌陳執中  
罷判亳州以文彥博富弼並同中書門下平章事秋八  
月己丑契丹主宗真卒子洪基立乙未置臺諫章奏簿  
冬十二月丁亥修六塔河是歲蘇茂州蠻下溪州蠻各

入寇詔發兵討之龍賜州彭師黨以其族來歸封李德  
政子日尊爲交趾郡王大食西蕃安化州蠻來貢

嘉祐元年春正月甲寅朔帝不豫辛酉輔臣禱祠于大  
慶殿齋宿殿廡是月大雨雪木冰二月甲辰帝疾愈三  
月辛未司天監言自至和元年五月客星出東方守天  
關至是沒閏月癸未以王堯臣參知政事程戡爲樞密  
副使夏四月壬子朔六塔河復決丙辰裁定補蔭選舉  
法是月大雨水六月乙亥雨壞太社太稷壇詔羣臣實  
封言時政闕失秋七月乙酉命京東西河北監司分行  
水災州軍振饑蠲租己丑出內藏銀絹三十萬振貸河



北是月彗出紫微垣踰月乃滅八月庚戌朔日有食之  
癸亥狄青罷判陳州以韓琦爲樞密使九月辛卯大赦  
改元癸卯行御史遷次格冬十一月辛巳王德用罷爲  
景靈宮使以賈昌朝爲樞密使十二月壬子劉沆罷知  
應天府以曾公亮參知政事是歲融桂州蠻楊克端等  
內附占城大食西蕃來貢

二年春三月免黜落殿試舉人悉賜第夏四月丙寅幽  
州地大震壓者數萬人秋七月丁酉詔緣邊經略安撫  
使各舉文武官材堪將領者一人八月丁卯置廣惠倉  
九月庚子契丹再使來求御容冬十月乙巳遣翰林學

士胡宿奉御容如契丹十二月戊申置明經科詔自今  
間歲一貢舉是歲西南蕃西蕃諸族來貢

三年夏四月丙辰詔守令或貪恣老昏以弛爲寬以苛  
爲察以增賦斂爲勞以出入刑罰爲能而部使者莫之  
舉劾自今其各思率職毋撓權倖毋縱有罪以稱朕意  
六月丙午文彥博罷判河南府賈昌朝罷爲景靈宮使  
以韓琦同中書門下平章事宋庠田况爲樞密使張昇  
爲樞密副使秋八月巳亥朔日有食之巳未參知政事  
王堯臣卒是歲夔州路旱廣濟河溢原武河決害民田  
並振之安化州蠻來貢下溪州蠻彭仕義率衆降



四年春正月丙申朔日有食之二月己巳罷權茶詔曰  
古者山澤之利與民共之故民足於下而君裕於上國  
家無事刑罰以清自唐建中時始有茶禁上下規利垂  
二百年如聞比來爲患益甚民被誅求之困日惟咨嗟  
官受濫惡之入歲以陳積私藏盜販犯者寔繁嚴刑峻  
誅情所不忍是於江湖間幅員數千里爲陷窞以害吾  
民也朕心惻然念此久矣間遣使者往就問之而皆謹  
然顧弛其禁歲入之課以時上官一二近臣條析其狀  
朕猶若慊然又於歲輸裁減其數使得饒阜以相爲生  
俾通商利歷世之弊一旦以除著爲經常弗復更制損

上益下以休吾民尚慮喜於立異之人緣而爲姦之黨  
妄陳奏議以惑官司必寘明刑無或有貸庚午廣南言  
交趾寇欽州夏四月癸酉封柴氏後爲崇義公給田奉  
周室祀詔曰先王推紹天之序尚尊賢之義褒其後嗣  
賓以殊禮豈非聖人稽古報功之大典哉國家受命之  
元繼周而王雖民靈欣戴曆數允集而虞賓將遜德義  
不顯項者推命本始褒及支庶每遇南郊許奏白身一  
名充班行恩則厚矣而義未稱將上采姚姒之舊略循  
周漢之典詳其世嫡優以公爵異其仕進之路申以土  
田之錫俾廟寢有奉饗祀不輟庶幾乎春秋通三統厚



先代之制矣冬十月癸酉大禘于太廟大赦戊寅加恩百官是歲召河南處士邵雍不至喞斯囉來貢

五年春正月辛卯朔白虹貫日太白犯歲星三月乙未歲星晝見壬子以蝗澇相仍敕諸路振饑仍察州縣不稱職者夏四月癸未程戡罷為羣牧制置使以孫抃為樞密副使五月丁酉詔三司置寬恤民力司己酉召王安石入為三司度支判官秋七月癸巳邕州言交趾與甲峒蠻合兵寇邊都巡檢宋士堯拒戰死之詔發諸州兵討捕戊戌翰林學士歐陽脩上新唐書庚戌詔中書門下采端實之士明進諸朝辨繳巧偽者放黜之冬十

一月辛丑宋庠罷判鄭州以曾公亮為樞密使張昇孫抃並參知政事歐陽脩陳升之趙槩並為樞密副使十二月己卯蘇茂州蠻寇邕州辛巳諸州父老百歲以上者十二人並補州助教是歲大食來貢

六年春三月己亥同平章事富弼母喪去位夏四月庚辰陳升之罷知定州以包拯為樞密副使出諫官唐介趙抃御史范師道呂誨六月壬子朔日有食之壬申歲星晝見丙子以司馬光知諫院入對戊寅以王安石知制誥秋七月丙戌詔振恤淮南江浙水災癸巳詔曰臺諫為耳目之官乃聽險陂之人興造飛語中傷善良非



忠孝之行也中書門下其申飭百工務敦實行循而弗改者絀之八月戊寅詔曰朕觀古者治世牧民之吏多稱其職而百姓安其業今求材之路非不廣責善之法非不詳而吏多失職非稱所以爲民之意豈人才獨少而世變殊哉殆不得久於其官故也蓋智能材力之士雖有興利除害禁奸勸善之意非假以歲月則亦媮不爲用欲終厥功其路無由自今諸州縣守令有清白不擾政迹尤異而實惠及民者本路若州連書同罪保舉將政迹實狀以聞中書門下察訪得實許令再任閏八月庚子以曾公亮同中書門下平章事張昇爲樞密使

歐陽脩參知政事胡宿爲樞密副使是歲冬無冰占城安化州蠻來貢

七年春正月乙亥詔南郊以太祖配爲定制三月乙卯孫抃罷爲羣牧制置使以趙槩參知政事吳奎爲樞密副使夏四月夏國主諒祚遣使來稱宣徽南院使詔戒之曰維乃祖考克有西土世爲漢藩輔今爾弗蹈于前烈迺竊署重爵以奉幣於朝方邊吏拒還乃復稽留境上不及廷見之期洎朕親覽貢函而僭我王命實如所聞朕疑風俗荒遠未達朝廷之儀雖然棄信慢常誼不可長其務思先世之約以保綏于斯民毋忽是圖以奸



我有邦之罰今後所差使人卽不得僭擬五月戊午太白晝見庚午樞密副使包拯卒六月丙子朔歲星晝見秋七月戊申太白經天八月己卯詔以岳州防禦使宗實爲皇子賜名曙九月乙巳朔以皇子爲齊州防禦使進封鉅鹿郡公辛亥大饗明堂以真宗配帝大赦冬十月乙未太白晝見丙申詔內藏三司出緡錢百萬助糴天下常平倉是歲冬無冰占城來貢

八年春二月癸未帝不豫三月辛未帝崩在位四十二年五十四遺制皇子卽皇帝位山陵制度務從儉約九月英宗上尊諡曰神文聖武明孝皇帝廟號仁宗元

豐六年加今諡

論曰自漢以來稱守成令主必曰文景豈不以仁厚恭儉延重熙累洽之澤耶有宋仁宗果何媿矣帝在位四十二年宮室苑囿無所增飾燕私常服澣濯著令諸州旬上雨雪遇水旱則密禱禁庭或跣立殿下夜饑思膳燒羊戒勿宣泄大辟疑者皆上讞嘗謂輔臣曰朕未嘗詈人以死况敢濫用辟乎至於以忠厚待士夫以至誠待夷狄視累朝不加優哉乃若稽古右文表章學庸爲正學倡斯又文景所弗逮者獨惜關雎化缺不能復三代之治也噫



宋史新編卷四

宋史新編卷五

本紀五

英宗

明南京戶部主事莆田柯維騏編

英宗體乾膺曆隆功聖德憲文肅武睿神宣孝皇帝諱  
曙初太宗四子商王元份生濮安懿王允讓帝允讓第  
十三子也母仙遊縣君任氏明道元年正月二日生帝  
於宣平坊第赤光滿室四歲仁宗養於內寶元二年豫  
王生始歸濮邸性篤孝好讀書不爲燕嬉服御儉素如  
儒者景祐三年賜名宗實累遷岳州團練使嘉祐六年  
十月居濮王喪起復秦州防禦使知宗正寺累疏懇辭



終喪復授前命又辭七年八月復以爲岳州團練使遂立爲皇子改今名帝稱疾固辭凡十餘奏仁宗不允詔宗室安國公從吉等往諭旨帝不得已就召戒舍人曰謹守吾舍上有適嗣吾歸矣九月遷齊州防禦使鉅鹿郡公八年三月仁宗崩夏四月壬申朔皇后傳遺詔命帝嗣位癸酉大赦百官進秩一等乙亥帝不豫丙子尊皇后曰皇太后己卯詔請皇太后同聽政庚子立高氏爲皇后五月戊午以富弼爲樞密使秋七月壬子初御紫宸殿見百官癸亥歲星晝見八月癸巳以生日爲壽聖節九月辛亥子仲鍼進封淮陽郡王改名頊冬十月

甲午葬仁宗于永昭陵十二月己巳開經筵是歲于闐西南蕃來貢契丹遣使來弔祭及賀卽位

治平元年夏四月癸未放宮女百三十五人五月戊申皇太后還政閏月戊辰輔臣進秩一等六月己亥子頊顥頥竝進封有差壬戌歲星晝見秋八月丙辰貶內侍都知任守忠蘄州安置九月庚午詔夏國精擇使人戒勵無紊舊章冬十月戊申詔近臣監司舉治行素著可備升擢者二人十一月乙亥科陝西民刺以爲義勇軍十二月戊子樞密副使吳奎父喪去位丙午以王疇爲樞密副使是歲再雨土畿內及二十五州軍水振之西



宋史新編卷五  
蕃瞎檀子瞎欺丁木征內附契丹遣使賀壽聖節及明年正旦自是歲交遣使如故事

二年春三月己巳周琮上明天曆夏四月戊戌詔議崇奉濮安懿王典禮五月癸亥詔以綜核名實勵臣下以陳升之爲樞密副使六月己酉詔尚書省集議濮安懿王典禮甲寅罷集議令有司博求典故務在合經詔遣官與契丹定疆界秋七月癸亥富弼罷判揚州庚辰張昇罷判許州以文彥博爲樞密使呂公弼爲樞密副使是月詔減乘輿服御放宮女百八十人八月庚寅京師大雨水乙未詔曰蓋聞古之聖賢在位陰陽和風雨時

日月光星辰靜黎民阜蕃以底休平朕甚慕之朕猥以眇身託于王公之上夙夜以思惟懼不能以承先帝鴻業而比年以來水潦爲沴迺八月庚寅大雨京師室廬墊傷被溺者衆大田之稼害于有秋竊迹災變之來曾不虛發豈朕之不敏於德而不明於政與將天下刑獄滯寃賦繇煩苦民有愁歎亡聊之聲以奸其順氣歟不然則何天戒之甚也今飭躬焦思欲銷復大異而未聞在位者之忠言進祈自新厥路何繇焉應中外臣寮竝許上實封言時政闕失及當世之利病可以佐元元者悉心以陳母有所諱執政大臣皆朕之股肱其協德交



脩以輔朕之不逮九月壬午太白犯南斗冬十月乙巳  
雨木冰十一月壬申有事南郊大赦是歲蔣波繡雲龍  
賜等州來貢

三年春正月癸酉契丹改國號爲遼己卯溫州火丁丑  
皇太后手詔下中書門下曰吾聞羣臣議請皇帝封崇  
濮安懿王至今未見施行吾載閱前史乃知自有故事  
濮安懿王譙國夫人王氏襄國夫人韓氏仙遊縣君任  
氏皇帝可稱親濮安懿王稱皇王氏韓氏任氏竝稱后  
帝卽日下手詔曰稱親之禮謹遵慈訓追崇之典豈易  
克當且欲以塋爲園卽園立廟俾王子孫主奉祠事壬

午御史呂誨范純仁呂大防坐議禮貶三月辛酉貶諫  
官傅堯俞御史趙鼎趙瞻先是庚申彗見于室越數日  
有孛于畢如月竝逾兩月乃滅夏四月庚戌胡宿罷知  
杭州以郭逵同簽書樞密院事五月戊辰帝謂宰相曰  
朕欲與公等日論治道中書常務有定制者付有司行  
之秋九月壬子朔日有食之是秋夏人攻大順城遣使  
以違約詰責之冬十月丁亥詔禮部三歲一貢舉遂爲  
定制甲午詔宰臣參知政事舉才行士可試館職者各  
五人十一月戊午帝不豫十二月壬寅立穎王頊爲皇  
太子癸卯大赦羣臣子爲父後者賜勳一轉



四年春正月庚戌朔羣臣上尊號丁巳帝崩在位五年  
年三十六帝之爲皇子也慎靜恭默天下陰知其有聖  
德及卽位命近臣以官而不名嘗語神宗曰舊制士大  
夫之子尚帝女皆升行以避舅姑之尊義甚無謂朕思  
此寤寐不平豈可以富貴之故屈人倫長幼之序也可  
詔有司革之會疾不果神宗述其事焉神宗卽位之六  
月上尊謚曰憲文肅武宣孝皇帝廟號英宗元豐六年  
加今謚

論曰每讀宋本紀言至於厚陵之享國弗永未嘗不掩  
卷太息曰嗟乎盛德主也夫吐珠於澤其誰不舍矧大  
寶所屬固讓將終身雖舜禹受禪何以尚茲及踐位臨  
政必詢朝廷故事與古治所宜裁決常出羣臣意表其  
明睿又如此胡天不欲延嘉祐之澤俾弗克大有所爲  
也此與唐之順宗何異然順宗繼體中興而帝一傳遽  
衰宋業豈不尤可惜哉

### 神宗

神宗體元顯道法古立憲帝德王功英文烈武欽仁聖  
孝皇帝諱頊英宗長子也母曰宣仁聖烈皇后高氏慶曆  
八年四月十日生帝于濮王宮八月賜名仲鍼授率府  
副率遷至右千牛衛將軍嘉祐八年英宗卽位進安州



宋史新編卷五  
觀察使封光國公是年五月受經于東宮帝隆準龍顏  
動止皆有常度而天性好學日晏忘食每正衣冠拱手  
雖大暑未嘗用扇九月進忠武軍節度使同中書門下  
平章事淮陽郡王改今諱治平元年進封穎王三年十  
二月立爲皇太子四年正月丁巳英宗崩帝卽位戊午  
赦天下巳未尊皇太后曰太皇太后皇后曰皇太后丙  
寅復以吳奎爲樞密副使戊辰宰臣韓琦曾公亮樞密  
使文彥博參知政事歐陽脩趙槩暨判揚州富弼等進  
秩有差進封弟顥昌王頴樂安郡王二月乙酉立向氏  
爲皇后戊子進封李日尊爲南平王庚寅以生日爲同

天節三月壬申歐陽脩罷知亳州癸酉以吳奎參知政  
事閏月甲申夏國主諒祚遣使獻方物謝罪因賜詔曰  
朕以夏國累年以來數興兵甲侵犯邊陲驚擾人民誘  
迫熟戶去秋乃復直叩大順圍迫城寨焚燒村落抗敵  
官軍邊奏屢聞人情共憤羣臣皆謂夏國已違誓詔請  
行拒絕先皇帝務存含恕且詰端由庶觀逆順之情以  
決衆多之論逮此遜章之稟命已悲仙馭之上賓朕纂  
極云初包荒在念仰循先志俯諒乃誠旣自省於前辜  
復願堅於永好苟奏封所敘忠信無渝則恩禮所加歲  
時如舊安民保福不亦休哉乙巳詔曰歲比不登今春



時雨農民桑蠶穀麥衆作勤勞一歲之功併在此時其  
委安撫轉運司飭戒州縣吏省事息民無奪其時夏四  
月丙寅御史中丞王陶侍御史吳申呂景以過毀大臣  
黜罰壬申出諸州貢物名件手詔曰四方入貢雖云古  
禮考之禹制未有若茲之繁也又所貢物多飲食之類  
缺亦無害自今其悉罷之六月己未振河北流民秋八  
月癸酉葬英宗于永厚陵九月壬午祧僖祖辛卯徙封  
弟顥岐王頊高密郡王富弼爲尚書左僕射戊戌以王  
安石爲翰林學士辛丑韓琦罷判相州吳奎罷知青州  
陳升之罷知越州以呂公弼爲樞密使張方平趙抃並

參知政事韓絳邵亢並爲樞密副使冬十月丁未富弼  
罷判河陽己酉開經筵參知政事張方平父喪去位癸  
丑詔翰林學士及御史中丞各舉材堪御史者二人甲  
寅製資治通鑑序賜司馬光癸酉知青澗城种諤取綏  
州十一月丁丑詔近臣各舉才行可任使者一人戊寅  
詔求直言十二月丙寅詔州縣吏並緣爲姦致獄多瘕  
死歲終會其數論罪著爲令是月夏主諒祚卒子秉常  
立是歲遼遣使來弔祭及賀卽位其賀生辰正旦自是  
歲交遣使如故事

熙寧元年春正月甲戌朔日有食之丙申趙槩罷知徐



州以唐介參知政事三月丙戌詔恤刑夏四月乙巳詔翰林學士王安石越次入對六月辛亥詔諸路興水利乙亥河決棗彊埽丙寅命翰林學士司馬光御史中丞滕甫裁定國用秋七月癸酉立謀殺減等令語在刑法志已卯以陳升之知樞密院事壬午以恩冀州河決振被溺家八月甲子詔曰昔我藝祖皇帝之興以天發之期兵未始一血刃而卒再造區夏其大謀盛烈被諸萬世而莫高焉朕奉承聖緒夙夜不敢康乃顧後之子孫寢微弗顯而有司未嘗議封爵之文豈朕所以尊大統推親親之意哉且積厚者其流遠施大者其報豐宜令

中書門下考太宗之懿以屬近而行尊者一人裂土地而王之使常從獻于郊廟世世勿復絕九月辛未以太祖曾孫從式封安定郡王冬十月乙卯出奉宸庫珠玉千三百四十萬付河北以備買馬戊辰禁銷金服飾十一月丁亥祀天地于圜丘大赦十二月庚申詔判汝州富弼爲集禧觀使乘驛赴闕辛酉邵亢罷知越州是歲京師瀛莫州地大震河東饑振之子闔來貢

二年春二月己亥以富弼同中書門下平章事庚子以王安石參知政事甲子陳升之王安石創置三司條例議行新法是月封秉常爲夏國主三月戊子秉常上誓



表納塞門安遠二砦乞綏州許之夏四月丁未參知政  
事唐介卒丁巳遣使諸路察農田水利賦役五月癸未  
翰林學士鄭獬罷知杭州宣徽北院使王拱辰罷判應  
天府知制誥錢公輔罷知江寧府並以沮新法故六月  
戊申詔修二股河丁巳御史中丞呂誨以論王安石罷  
知鄧州秋七月乙丑朔日當食雲陰不見辛巳立淮浙  
江湖六路均輸法壬午詔振恤被水州軍八月癸卯侍  
御史劉琦貶監處州鹽酒務御史裏行錢顛貶監衡州  
鹽稅乙巳殿中侍御史孫昌齡貶通判蘄州丙午同修  
起居注范純仁罷同知諫院明日出知河中府並以論

王安石新法故辛酉以程顛王子韶竝為太子中允權  
監察御史裏行壬戌侍御史知雜事劉述同判刑部丁  
諷坐受刑名敕不卽下述貶知江州諷貶通判復州審  
刑院詳議官王師元坐言許遵議刑名不當貶監安州  
稅九月丁卯立青苗法戊辰出內庫緡錢百萬糴河北  
常平粟壬辰以呂惠卿為太子中允崇政殿說書冬十  
月丙申富弼罷判亳州以陳升之同中書門下平章事  
是月以夏人渝初盟乃城綏州不易二砦改名綏德城  
十一月乙丑命樞密副使韓絳制置三司條例甲戌詔  
釐改皇族授官法丙子頒農田水利約束閏月壬子置



交子務是月遣官提舉諸路常平廣惠倉兼管勾農田水利差役事十二月丙戌增三京留司御史臺國子監及宮觀官是歲古勿峒首領曩知會歸順交趾來貢三年春二月壬申以司馬光爲樞密副使固辭不拜乙酉韓琦請罷河北安撫使止領大名府路從之三月己亥始策進士罷詩賦論丙辰立試刑法及詳刑官右正言孫覺以沮青苗貶知廣德軍夏四月戊辰御史中丞呂公著以沮青苗貶知潁州己卯趙抃罷知杭州以韓絳參知政事是月監察御史裏行程顛張戩王子韶右正言李常侍御史知雜事陳襄坐忤王安石相繼罷以

前秀州軍事判官李定爲太子中允監察御史裏行五月甲辰詔罷制置三司條例歸中書六月丙戌知諫院胡宗愈貶通判真州秋七月壬辰呂公弼罷知太原府以馮京爲樞密副使八月己卯夏人犯大順城其後屢入寇九月己亥始試法官庚子曾公亮罷爲集禧觀使辛丑以馮京參知政事吳充爲樞密副使癸丑司馬光罷知求興軍冬十月戊寅同平章事陳升之母喪去位十二月己未立諸路更戌法乙丑立保甲法丁卯以韓絳王安石竝同中書門下平章事王珪參知政事戊寅初行免役法是歲翰林學士范鎮以忤王安石致仕直



史館蘇軾罷通判杭州廣源下溪州蠻內附交趾來貢  
河北陝西旱饑振之

四年春正月己丑知青澗城种諤襲夏兵于囉兀北敗  
之遂城囉兀二月丁巳朔罷詩賦及明經諸科以經義  
論策試進士壬申進封弟頽爲嘉王三月丁亥夏人陷  
撫寧堡丙午貶种諤潭州安置丁未韓絳坐失律罷知  
鄧州夏四月癸酉司馬光權判西京留臺种諤再貶賀  
州別駕六月甲戌判亳州富弼坐格青苗徙汝州秋七  
月丁酉監察御史裏行劉摯罷監衡州鹽倉御史中丞  
楊繪貶知鄭州八月癸酉置洮河安撫司命王韶主之

九月丙戌河決鄆州辛卯大饗明堂以英宗配赦天下  
庚子夏人來貢冬十月壬子朔行募役法立選人及任  
子出官試法戊辰立太學生內外上舍法是歲層檀高  
麗來貢渝州夷賊李光吉叛討平之河北饑兩浙水振  
之

五年春正月己亥置京城邏卒察謗議時政者二月丙  
寅以蔡挺爲樞密使三月丙午置市易務夏四月庚戌  
朔立殿前馬步軍春秋校試殿最法辛未塞北京決河  
五月辛巳以古渭砦爲安遠軍命王韶兼知軍詔宗室  
非袒免親許應舉丙午行保馬法六月乙亥置武學秋



宋史新編卷五  
七月閏庚戌遣中書檢正官章惇察訪荆湖北路八月  
甲申秦鳳路沿邊安撫使王韶復武勝軍遂改爲鎮洮  
軍乙未詔侍從及諸路監司各舉有才行者一人甲辰  
頒方田均稅法是月前參知政事歐陽脩卒詔求脩所  
撰五代史九月丙寅少華山崩冬十一月壬申章惇開  
梅山置安化縣十二月壬午以陳升之爲樞密使是歲  
龜茲來貢

六年春正月辛亥復僖祖爲太廟始祖祧順祖于夾室  
二月丙申王韶復河州獲木征妻子三月庚戌置經義  
局命王安石提舉丁卯詔進士諸科並試明法注官庚

午封李日尊于乾德爲交趾郡王夏四月甲戌朔日當  
食雲陰不見乙亥置律學己亥文彥博罷判河陽五月  
乙丑遣中書檢正官熊本措置瀘夷秋八月戊戌復比  
閭族黨法九月壬寅置兩浙和糴倉立斂散法戊申詔  
興水利戊午岷州首領木令征以城降王韶入岷州冬  
十月辛未章惇平懿洽州蠻辛巳以復熙河洮岷疊宕  
等州御紫宸殿受羣臣賀解所服玉帶賜王安石壬辰  
行折二錢是歲收免行錢開直河振兩浙江淮饑陀婆  
離大食交趾西南龍蕃來貢

七年春正月甲子熊本平瀘夷二月乙未知河州景思



立等與青宜結鬼章戰于踏白城敗死廢遼州三月壬寅木征鬼章寇岷州丙辰遼遣蕭禧來言河東疆界已未行方田法是月大旱監安上門鄭俠上流民圖夏四月癸酉罷新法是日雨明日以呂惠卿鄧綰言下鄭俠獄復行新法惟方田暫罷乙酉王韶進築珂諾城連敗木征降之丙戌王安石罷知江寧府以韓絳同中書門下平章事呂惠卿參知政事五月辛亥罷賢良方正等科乙丑大雨水壞陝平陸二縣六月丁亥作渾儀浮漏以木征爲榮州團練使賜姓趙名至忠秋九月壬子三司火癸丑置京畿河北京東西路三十七將冬十月壬

申詔前宰相韓琦富弼文彥博曾公亮條代北事宜以聞庚辰置三司會計司以韓絳提舉十一月己未祀天地于圜丘大赦十二月丁卯以王韶爲樞密副使是歲于闐高麗來貢武都諸夷內附河北饑振之

八年春正月庚子蔡挺罷判留司御史臺馮京罷知亳州乙卯雨水冰二月癸酉復以王安石同中書門下平章事戊寅詔以李靖營陣法教殿前馬步軍乙酉初行河北戶馬法三月庚子遼遣蕭禧再來遣韓縝往河東會議癸丑遣沈括如遼報聘戊午太白晝見夏四月戊寅以吳充爲樞密使閏月乙未陳升之罷判揚州壬寅



沈括上奉元曆五月丁丑雨土及黃毛六月巳酉頒王安石詩書周禮義于學官秋七月戊寅太白晝見戊子命鹽鐵副使韓縝如河東割地以畀遼八月庚寅朔日當食雲陰不見庚戌韓絳罷知許州丁巳大閱九月庚申朔立武舉絕倫法冬十月庚寅呂惠卿罷知陳州乙未彗出軫巳亥詔求直言壬寅赦天下罷手實法丁未彗滅十一月交趾大舉入寇陷欽州廉州十二月壬寅以元絳參知政事曾孝寬簽書樞密院事辛亥命天章閣待制趙卨爲安南道招討使內侍嘉州防禦使李憲副之以討交趾是歲鄜延環慶及常潤州饑並振之

九年春正月乙丑雨木冰戊辰交趾陷邕州知州蘇緘死之巳卯章惇招降五溪蠻遂城下溪州改名會溪二月戊子以宣徽南院使郭逵爲安南道招討使罷李憲以趙卨副之詔占城占臘合擊交趾巳丑宗哥首領鬼章寇五年谷三月庚辰以种諤知岷州夏四月辛亥茂州夷寇邊遣內押班王中正經制五月丁卯城茂州秋八月巳丑罷鬻祠廟錢冬十月丙午王安石罷知江寧府以吳充王珪竝同中書門下平章事馮京知樞密院事十二月癸卯安南招討使郭逵敗交趾兵於富良江獲其僞太子洪真李乾德奉表詣軍門降遂班師是歲



宋史新編卷五  
朱崖軍黎賊入寇詔討之大理占城來貢

十年春二月丁酉詔諸州歲以十一月給老疾貧乏者粟盡三月乃止巳亥王韶罷知洪州丙午以廣源州爲順州秋七月乙亥郭達以安南失律貶左衛將軍丙子河決澶州曹村埽八月甲辰詔侍從臺諫監司各舉文臣有才行者一人冬十一月庚午以西蕃邈川首領董氈都首領青宜結鬼章爲廓州刺史阿令骨爲松州刺史甲戌祀天地于園丘大赦十二月壬子詔改明年元丁亥子傭封均國公是歲占城注輦來貢

元豐元年春正月壬辰以孫固同知樞密院事巳亥簽

書樞密曾孝寬父喪去位三月癸未詔内外文武官各舉堪應武舉一人夏四月戊辰塞曹材決河名其埽曰

靈平六月癸卯朔日有食之秋七月癸酉朔命西上閣門使韓存寶經制瀘州納溪夷九月乙酉以呂公著薛向竝同知樞密院事冬十一月癸巳辰州徭賊叛詔討之十二月戊午置大理獄是歲詔詳定郊廟及朝會禮儀交趾于闐來貢河北諸州水武康軍及梁縣嘉禾生河中府及夔州甘露降終神宗世甘露降凡二十

二年春正月甲午詔以十哲從祀孔子二月甲寅日中有黑子自熙寧十年至此凡四見乙卯瀘州夷乞弟犯



邊詔討之庚寅疏汴洛夏五月庚辰詔曰濮安懿王先  
帝斟酌典禮卽園立廟詔王子孫歲時奉祀義協恩稱  
後世無得議焉今王夫人名位或未正塋域或異處有  
司置而不講曷足以彰明先帝甚盛之德仰承在天之  
志乎三夫人可竝稱曰王夫人命有司擇歲月遷祔濮  
園俾其子孫以時奉主與王合食而致孝思焉甲申元  
絳罷知亳州戊子以蔡確參知政事六月甲寅清汴成  
冬十月癸卯置籍田令詔立水居戶賦役法乙卯太皇  
太后曹氏崩是歲復詳定郊廟及朝會禮儀知湖州蘇  
軾貶黃州團練使西南諸蕃來貢

三年春二月丙午以章惇參知政事三月乙丑吳充罷  
爲西太一宮使癸酉葬慈聖光獻曹皇后于永昭陵夏  
四月庚申詔御史臺六察以糾劾多寡爲殿最五月甲  
申復命韓存寶經制瀘夷是月詔致仕翰林學士范鎮  
祕書監劉几等同議大樂六月丙午詔中書詳定官制  
秋七月庚午河決澶州癸未彗出太微垣丙戌避殿減  
膳求直言九月乙亥正官名辛巳大饗明堂罷羣神從  
祀以英宗配帝赦天下是月以薛向孫固竝爲樞密副  
使親王顥顧竝進封前宰相王安石等悉進秩以馮京  
爲樞密使已而薛向罷知潁州以呂公著爲樞密副使



冬十一月己丑朔日當食雲陰不見是歲高麗于闐南丹州來貢

四年春正月乙未命步軍都虞候林廣代韓存寶經制瀘夷庚子詔試進士加律義辛亥馮京罷知河陽以孫固知樞密院事呂公著韓縝同知樞密院事三月癸卯章惇罷知蔡州甲辰以張瑛參知政事戊申大閱夏四月己巳詔罷南郊合祭天地乙酉河決澶州小吳埽五月戊申封晉程嬰爲成信侯公孫杵臼爲忠智侯立廟絳州六月河北諸路蝗秋七月庚寅以夏人囚其主乘常詔五路會兵討之甲辰韓存寶坐逗留無功伏誅已

酉詔議選格內外官司舉官悉罷八月丁丑熙河經制李憲敗夏人于西市新城遂復蘭州九月辛亥鄜延經略副使种諤又敗夏人于無定川遂克米脂城冬十月庚午環慶經略使高遵裕復通遠軍十一月癸未朔日有食之癸卯种諤至夏州索家平兵衆三萬人以無食而潰丙午高遵裕師還夏人來追亦潰十二月辛未林廣破乞弟于納江是歲拂菻于闐董氈來貢

五年春正月庚子貶高遵裕郢州團練副使本州安置乙巳作新渾儀浮漏辛亥詔再議西討以李憲爲涇原熙河蘭會安撫制置使李浩權安撫副使三月壬寅鄜



延副總管曲珍敗夏人于金湯夏四月壬子朔日當食  
不見癸酉官制成以王珪爲尚書左僕射兼門下侍郎  
蔡確爲尚書右僕射兼中書侍郎章惇爲門下侍郎張  
璪爲中書侍郎蒲宗孟爲尚書左丞王安禮爲尚書右  
丞丁丑呂公著罷知定州五月戊戌詔兩省官舉可任  
御史者各二人甲辰遣給事中徐禧治鄜延邊事六月  
辛亥環慶經略司遣將與夏人戰破之戊寅曲珍等敗  
夏人于明堂川秋七月庚子以蔡京爲起居郎同詳定  
官制八月壬子子備進封延安郡王庚申詔歲以四孟  
月朝獻景靈宮辛未种諤以行軍迂道降文州刺史甲

戌城永樂九月丁亥夏人三十萬衆寇永樂曲珍戰不  
利裨將寇偉等死之夏人遂圍城戊戌城陷給事中徐  
禧等死之庚子安化蠻寇宜州知州王奇死之冬十月  
甲寅知延州沈括坐措置乖方責授均州團練副使隨  
州安置鄜延總管曲珍坐城陷敗走降授皇城使癸酉  
貶知太原府呂惠卿知單州是歲渤泥交趾西南龍蕃  
來貢

六年春正月丁丑朔御大慶殿始用新樂丙午封楚屈  
平爲忠潔侯二月丁未夏人攻蘭州丙辰貶經略使李  
憲爲經略安撫都總管夏五月甲午夏人寇蘭州右侍



禁葺定死之癸卯賜資州孝子支漸粟帛閏六月乙亥朔夏主秉常請修貢許之丙戌汴水溢秋七月丙辰孫固罷知河陽以韓縝知樞密院事安燾同知樞密院事八月辛卯蒲宗孟罷知汝州王安禮爲尚書左丞李清臣爲尚書右丞九月癸卯朔日有食之冬十月癸酉朔夏主秉常請修貢乞還舊疆戊子封孟軻爲鄒國公辛丑封馬援爲忠顯王十一月丙午祀昊天上帝于圜丘罷合祭赦天下是歲層檀于闐來貢

七年春正月癸丑夏人寇蘭州三月癸亥白虹貫日夏四月癸巳夏人寇延州五月辛酉白虹貫日壬戌以孟

軻配食文宣王封荀况揚雄韓愈爲伯竝從祀六月丙子夏人寇德順軍巡檢王友死之秋七月甲寅王安禮罷知江寧府冬十月乙亥夏人寇熙河十一月丁酉朔夏人寇靜邊砦將白玉李貴死之甲辰夏國主秉常復遣使來貢十二月戊辰端明殿學士司馬光上資治通鑑是歲河東饑河北水伊洛溢河決元城竝振之大食三佛齊西南龍蕃來貢

八年春正月戊戌帝不豫三月甲午朔立延安郡王傭爲皇太子賜名煦皇太后權同處分軍國事乙未赦天下戊戌帝崩在位十九年年三十八九月哲宗上尊諡



宋史新編卷五  
曰英文烈武聖孝皇帝廟號神宗紹聖二年加諡曰經  
天法古運德建功英文烈武欽仁聖孝崇寧三年更諡  
曰體元顯道帝德王功英文烈武欽仁聖孝政和二年  
加今諡

論曰人主負高世之資者恒患於喜功人臣售遇主之  
術者多失於自用茲二者常相因爲害可勝道哉宋自  
開國百餘年寓內又安神宗乃以不克復幽燕爲病夙  
夜勵精欲雪數世之恥爲前人所不能爲於是在廷忠  
鯁之臣斥逐以盡惟任一合意之王安石援引邪佞悉  
更祖宗成法經營所謂富強者旣而民怨日叢外患日  
熾帝至中夜不寐遶榻行悔何及矣安石旣死其說猶  
行於紹聖崇寧政和間靖康之禍誰實基之書曰邦之  
杌隍曰由一人其神宗任安石之謂耶



身見新編卷三

三



